



# JORNAL

do

## Parlamento Nacional

III LEGISLATURA

4.ª SESSÃO LEGISLATIVA (2015-2016)

## REUNIÃO PLENÁRIA DE 13 DE OUTUBRO DE 2015

**Presidente:** Ex.<sup>mo</sup> Sr. Adérito Hugo da Costa

**Vice-Secretária:** Ex.<sup>ma</sup> Sr.<sup>a</sup> Ângela Corvelo Sarmento

### SUMÁRIO

Sr. Presidente loke sessão plenária iha tuku 10 liu minuto 19 dadeer no informa ba Deputado sira katak sei la discute kona-ba membro na'in-rua ba Conselho de Opinião da Rádio e Televisão de Timor-Leste, E.P., tanba iha lacuna balu ne'ebé Parlamento deteta, nune'e la tau assunto ne'e iha agenda, iha Período da Ordem do Dia.

Sr.<sup>a</sup> Josefa Álvares Pereira Soares (FRETILIN) concorda ho cancelamento ba agenda Período da Ordem do Dia nian tanba Bancada FRETILIN mós sei apresenta nia candidato sira ba Conselho de Opinião da Rádio e Televisão de Timor-Leste, EP.

Sr.<sup>a</sup> Vice-Secretária (Ângela Corvelo Sarmento) halo leitura ba carta de justificação das faltas hussi Sr. Deputado balu.

Tuirmai, Sr. Osório Florindo da Conceição Costa (FRETILIN) hato'o declaração política Bancada

FRETILIN nian em relação ba expulsão funcionário balu hussi Instituto de Petróleo e Geologia (IPG).

Iha intervenção diversa sira: Sr. Manuel Gaspar Soares da Silva (FRETILIN) secunda declaração política hussi Bancada FRETILIN nian kona-ba crise institucional iha IPG. Nia preocupa mós ba funcionamento Timor Telecom nian tanba durante loron rua nia laran ona mak la funciona ho di'ak bainhira cliente sira enche pulsa. Iklusliu, Deputado ne'e questiona kona-ba problema bee moos iha Suco Uaitame, Viqueque nian, tanba to'o agora comunidade sira sei la hetan acesso nafatin ba bee moos.

Sr.<sup>a</sup> Izilda Manuela da Luz Pereira Soares (CNRT) hussu ba Sr.<sup>a</sup> Secretária de Estado dos Assuntos Parlamentares atu haree kona-ba assunto médico ida ne'ebé serviço iha Posto Administrativo Zumalai ne'ebé halai sai hussi clínica ne'ebá nian tanba hetan intimidação. Nia hatutan hodi questiona mós kona-ba

médico ida ne'ebé celebra contrato ho Ministério da Saúde hodi foti especialidade iha parte ginecologista iha li'ur, maibé serviço fali iha Irian Jaya, nune'e nia hussu ba governo atu controla. Deputada ne'e mós hein katak minimercado sira ne'ebé abandonado hela, bele reativa filafali tuir declaração ne'ebé Sr. Vice-Ministro do Comércio, Indústria e Ambiente hato'o ona iha televisão.

Sr.<sup>a</sup> Olinda Morais (PD) hussu ba Governo atu buka dalan hodi bele haloot restos mortais hirak ne'ebé iha hela ossuário molok halo Desluto Nacional. Tuirmai, Deputada ne'e mós hussu consideração hussi Estado ba carta ne'ebé oan-kiak massacre Aitana nian haruka dala rua ona ba Estado.

Sr. David Dias Ximenes (FRETILIN) reforça Deputado Osório da Conceição Costa nia intervenção iha Sessão Plenária liubá kona-ba julgamento iha Suai ne'ebé entre juiz ho arguido sei relação familiar, nune'e nia hussu atubele haree irregularidade sira-ne'e. Deputado ne'e mós questiona kona-ba existência Raio X nian iha hospital distrital sira no hussu ba comissão competente atu verifica ida-ne'e. Iha sorin seluk, nia mós hussu atu profissionais de saúde sira tem que iha formação adequada hodi halo atendimento. Nia preocupa ba falta de água potável iha Bairro Taibessi, maibé iha parte balu bee sulin estraga de'it. Ikusliu, Deputado ne'e sugere atu fornecimento combustível, eletricidade no água potável ne'e empresa pública mak kaer hodi hatama receitas ba Estado, nune'e bele hamenos dependência ba fundo mina-rai nian.

Sr.<sup>a</sup> Maria Fernanda Lay (CNRT) hatete katak iha Instituto de Petróleo e Geologia la'ós ema na'in-haat de'it hanessian declaração ne'ebé Sr. Deputado Osório Florindo hato'o, maibé hamutuk ema na'in-14 mak atu hassai, e ne'e Estado gasta ona orçamento ba sira-nia formação. Nia hatutan tan katak funcionário iha IPG hanessian funcionário público tanba sira hetan férias ba 20 dias tuir decreto-lei ne'ebé iha e la'ós funcionário semipúblico ka semiprivado hanessian ema hatete. Nia lamenta mós tanba iha IPG, Conselho Diretivo acumula mós knaar ba presidência IPG nian rassik, nune'e sussar atu controla malu. Deputada ne'e hussu ba Sr.<sup>a</sup> Secretária de Estado dos Assuntos Parlamentares atu fó informação kona-ba manual de formação dos

professores ne'ebé nia hato'o tiha ona. No hussu mós tau matan ba Sr. Francisco Xavier do Amaral nia rate ne'ebé horas ne'e sai fali armazém ba restos mortais heróis nacional nian. Ikusliu, nia fó-hanoin ba Mesa katak Lei da Proteção dos Consumidores pronto ona no hussu atu conclui serviço ba ida-ne'e lailais liu, molok tama ba discussão Orçamento Geral do Estado para 2016.

Sr.<sup>a</sup> Anastácia da Costa Amaral (FRETILIN) secunda declaração ne'ebé foti iha sessão plenária loron ida liubá hussi Deputado na'in-tolu kona-ba projeto ZEESM (Zona Especial de Economia Social de Mercado) nian. Nia secunda mós declaração política Bancada FRETILIN nian kona-ba estatuto funcionário IPG nian. Deputada ne'e mós questiona kona-ba projeto emergência hussi 2013 nian no mós ponte no *branjong* ne'ebé halo iha Viqueque ne'ebé la iha estudo ida ne'ebé di'ak molok atu halo. Iha sorin seluk, nia exige resposta hussi Governo kona-ba condição estrada iha Hudi Laran, liuliu medida estrada nian ne'ebé seidauk claro. Tuirmai, nia preocupa ba rai-henek iha mota Wetuku, Viqueque nian, ne'ebé iha qualidade di'ak, maibé ema bá suru gratuita de'it sem receita ida mak tama ba Estado. Ikusliu, relaciona ho mafioso sira ne'ebé mossu hodi lohi ema, nia recomenda mós ba Governo atu haree companhia telecomunicação sira hanessian, Timor Telecom, Telkomcel no Telemor atu fa'an de'it sira-nia cartão SIM (*Subscriber Identity Module*) iha sira-nia loja no regista cliente sira-nia naran hodi nune'e fácil atu deteta, karik mossu problema.

Sr. César Valente de Jesus «Piloto» (CNRT) lamenta kona-ba estrada hussi Tibar bá Liquiçá ne'ebé nia *branjong* la iha qualidade no falta de controlo hussi Governo. Deputado ne'e mós lamenta tanba capitalista sira, liuhossi Estado ida-ne'e, duni cidadão timoroan sira hussi sira-nia rai ne'ebé sira hela kleur bá sem valor e hussu atu bele respeita cidadão sira tuir lei ne'ebé vigora.

Sr.<sup>a</sup> Benvinda Catarina Rodrigues (FRETI-MUDANÇA) questiona kona-ba fatin turístico hanessian Cristo Rei no Papa João Paulo II nian ne'ebé nia condição balu hahú aat no hussu ba Ministério do Turismo atu gere fatin hirak-ne'e, nune'e bele hatama

receita ba Estado. Tuirmai, nia lamenta mós tanba carreta boot barak mak tula rai-henek no fatuk britas, e halo nakfakar iha estrada protocolo sira iha Díli laran, tanba ne'e hussu ba Ministério competente atu bele tau atenção ba assunto ida-ne'e.

Sr. Natalino dos Santos Nascimento (CNRT) preocupa ba condição polícia Unidade de Patrulhamento da Fronteira (UPF) nian ne'ebé falta rádio comunicação no usa de'it telemóvel hodi bele contacto ba malu. Iha sorin seluk, polícia sira-ne'e nia ossan ba hahán nian mós la suficiente. Nia mós preocupa ba lei ordenamento território nian ne'ebé daudaun ne'e Governo seidauk submete ba Parlamento Nacional. Deputado ne'e hussu mós ba autoridade local sira atu fó educação cívica ba cidadão sira atu evita estrago ba sassán Estado nian iha fatin público sira. Secunda mós intervenção Deputada Benvinda Catarina nian kona-ba facilidade ne'ebé aat iha Cristo Rei. E liga ba manutenção ba jardim ka fatin turístico sira, nia hussu atu define didi'ak serviço entre Ministério do Turismo no Ministério da Administração Estatal. Iksliu, nia hussu ba Vice-Ministro da Solidariedade Social atu resolve problema veterano nian iha Oecússi ne'ebé la simu sira-nia subsídio.

Sr. Francisco Miranda Branco (FRETILIN) declara katak Bancada FRETILIN hakarak halo inquérito parlamentar ba Instituto de Petróleo e Geologia tanba mossu abuso de poder. Iha sorin seluk, Deputado ne'e hussu atu halo mós auditoria ba sistema *free balance* ne'ebé Ministério das Finanças implementa.

Sr.<sup>a</sup> Maria Rosa da Câmara «Bi Soi» (CNRT) critica conteúdo *Jornal Nacional Diário* nian ne'ebé publica

notícia balu ne'ebé la loos relaciona ho entrevista ne'ebé nia fó ba jornal ne'e. Deputada ne'e mós lamenta tebes, tanba polícia bloqueia estrada balu hodi fó biban ba Comandante-Geral PNTL, Júlio da Costa Hornay, hodi liu no ignora tiha ema seluk ne'ebé usa mós estrada pública.

Sr.<sup>a</sup> Domingas Alves da Silva «Bilou-Mali» (CNRT) hato'o caso fa'an bee nian iha Suku Babulo, fatin Kamuria, ne'ebé bee-na'in sobu tiha instalação bee ba comunidade sira iha Suco Uaitame tanba seidauk selu ossan ba nia, nune'e Deputada ne'e hussu ba Comissão competente atu bá fiscaliza iha fatin refere.

Ikusmai, Sr.<sup>a</sup> Secretária de Estado dos Assuntos Parlamentares (Maria Teresinha Viegas) hatán ba Deputado sira tuirmai nia preocupação iha Sessão Plenária anterior: Sr. Osório Florindo da Conceição Costa, Sr. Francisco Miranda Branco, Sr. Manuel Gaspar Soares da Silva (FRETILIN), Sr.<sup>a</sup> Domingas Alves da Silva «Bilou-Mali», Sr.<sup>a</sup> Izilda Manuela da Luz Pereira (CNRT), Sr. Jorge da Conceição Teme (FRENTI-MUDANÇA), Sr. David Dias Ximenes (FRETILIN), Sr.<sup>a</sup> Maria Fernanda Lay (CNRT), Sr.<sup>a</sup> Anastácia da Costa Amaral (FRETILIN), Sr. César Valente de Jesus «Piloto» (CNRT), Sr.<sup>a</sup> Benvinda Catarina Rodrigues (FRENTI-MUDANÇA), Sr. Natalino dos Santos Nascimento, Sr.<sup>a</sup> Maria Rosa da Câmara «Bi Soi» (CNRT) e Sr.<sup>a</sup> Jacinta Abucáu Pereira (PD).

Sr. Presidente taka Sessão Plenária iha tuku 11 liu minuto 53 dadeer.

Sr. **Presidente** (Adérito Hugo da Costa): — Bom dia ba Ex.<sup>as</sup> Sr. Deputado no Sr.<sup>a</sup> Deputada sira hotu, assistente sira no *staff* sira hotu, ita hahú Sessão Plenária ohin nian.

*Horas hatudu tuku 10 liu minuto 19 dadeer.*

Primeiro, hakarak hussu desculpa tanba tarde uitoan, e tarde tanba iha assuntos em relação ho agenda ne'ebé Ita-Boot sira bele haree. Horissehik ita iha ponto agenda nian ida pendente atu halo remata iha ohin, iha Período da Ordem do Dia, mas agenda ne'ebé distribui ona horissehik lokraik, ne'ebé iha Ita-Boot sira-nia mesa ne'e, iha mudanças tan razão balu, e ne'e em relação ba agenda Período da Ordem do Dia ne'ebé ita atu halo kona-ba Conselho de Opinião da Rádio e Televisão de Timor-Leste, Empresa Pública (RTTL, E.P.). Mesa deteta katak iha lacuna balu em relação ho estatuto Rádio e Televisão Timor-Leste nian ne'ebé precisa halo coordenação fali, halo comunicação fali, entre Parlamento ho bancadas ou Deputado sira ne'ebé apresenta candidato no mós halo coordenação ho Executivo, liuliu ministério tutela sira em relação ho estatuto RTTL, E.P. nian. Ne'e iha Decreto-Lei ne'e, ne'ebé Parlamento deteta katak iha lacunas em termos de representante ba Conselho de Opinião da Rádio e Televisão de Timor-Leste ne'ebé Parlamento tem que hili ema na'in-rua, e ho requisitos ne'ebé hamossu problemas uitoan ka hamossu lacunas. Tanba ne'e mak Mesa, provisoriamente, cancela agenda ba Período da Ordem do Dia, ho razão atu coordena filafali através de Conferência de Líderes das Bancadas Parlamentares iha quinta-feira no mós coordena ho Executivo, em relação ho possibilidade atu halo alteração ba Decreto-Lei ba estatuto RTTL, E.P. nian ou iha mecanismo seluk ne'ebé ita bele halo. Depois bele reagenda fali, no caso de hotu-hotu concorda katak iha interpretação ba lacunas iha Decreto-Lei ne'ebé iha.

Portanto, horissehik Mesa rassik mós halo coordenação, fahe informação ho ministérios de tutela sobre assunto relevante, e iha posição hanessan, katak atu haree mós hodi aproveita lacunas ne'ebé iha, que Parlamento deteta em relação ho Conselho Opinião nian, para bele halo alteração dala ida de'it ho cláusula sira seluk ne'ebé precisa mós atu halo alteração. Tan ne'e mak ami sei continua coordena ho Secretária de Estado dos Assuntos Parlamentares ho ministério de tutela sobre assunto ida-ne'e. Ita hein katak to'o quinta-feira semana ne'e nian, Conferências de Líderes das Bancadas Parlamentares bele resolve, bele iha solução ba assunto ne'e. E karik ne'e possível para reagenda fali iha próxima semana, ita bele reagenda, mas, se hotu-hotu hanoin katak hein de'it ba bainhira halo alteração dala ida mak ita halo reagendamento, ne'e mós di'ak liután. Tanba na realidade Conselho de Opinião da Rádio e Televisão de Timor-Leste ne'ebé Parlamento nia representante na'in-rua hala'o knaar bá, começa iha 2011 to'o março 2015 ne'e, nia mandato hotu ona, maibé, na realidade, funcionamento hussi Conselho de Opinião ne'e mós ladún efetivo tanba questão seluk iha Decreto-Lei

ne'e rassik ne'ebé paralisa hela funcionamento órgão sira ne'ebé estabelece em relação ho lei. Ne'ebe, Sr. Deputado sira, ohin ha'u mós halo encontro ona ho presidente bancada rua nian ne'ebé propõe candidato na'in-rua ne'e, Bancada CNRT ho Bancada PD, sobre assuntos no lacunas ne'ebé ita deteta iha Decreto-Lei ba estatuto Rádio e Televisão Timor-Leste nian.

Ho nune'e, Sr. Deputado sira, ha'u clarifica ona assuntos sobre agenda nian ne'ebé ita hassai tiha ponto ne'e hussi ordem de trabalho iha Período Ordem do Dia ohin nian.

Iha observação ruma, Sr. Deputado sira, molok ita tama ba questão seluk? Sr.<sup>a</sup> Deputada Josefa, halo favor.

**Sr.<sup>a</sup> Josefa Alvares Pereira Soares (FRETILIN):** — Obrigada, Sr. Presidente.

Atu hatete de'it katak karik ita adia tiha eleição ne'e, ha'u hanoin ne'e di'ak liután tanba hussi Bancada Parlamentar da FRETILIN iha mós candidato ida ba Conselho de Imprensa, e só ohin mak nia bele hatama nia *CV (Curriculum Vitae)* ho carta de aceitação. Tanba ne'e, ha'u hanoin ne'e di'ak liután para bele hala'o dala ida de'it.

Segundo, Sr. Presidente, ha'u atu adianta uitoan, Bancada Parlamentar da FRETILIN iha declaração política ida para orsida atu halo.

Obrigada, Sr. Presidente.

**Sr. Presidente:** — Obrigado, Sr.<sup>a</sup> Deputada.

Sr.<sup>a</sup> Deputada Fernanda Lay, halo favor.

**Sr.<sup>a</sup> Maria Fernanda Lay (CNRT):** — Muito obrigada, Sr. Presidente.

Excelências, muito bom dia.

Ha'u, simplesmente, atu sugere ba Sr. Presidente, tanba Sr.<sup>a</sup> Secretária de Estado dos Assuntos Parlamentares la marca presença... Ha'u la hatene se iha técnicos que bele toma nota bainhira Deputado sira foti assunto ruma relacionado ho Governo?!

Muito obrigada.

**Sr. Presidente:** — Obrigado, Sr.<sup>a</sup> Deputada.

Sr. Deputado sira, iha assunto seluk tan?

Sim, Sr.<sup>a</sup> Secretária de Estado dos Assuntos Parlamentares seidauk to'o iha-ne'e tanba participa hela iha encontro ida, e ita bele hahú daudauk. Ha'u hein katak técnico hussi Secretaria de Estado dos Assuntos Parlamentares nian iha-ne'e. Di'ak, técnico sira iha hela.

Regista ona iha-ne'e declaração política hussi Bancada Parlamentar FRETILIN. Karik iha bancada seluk atu halo mós declaração política?

Dala ida tan atu hato'o mós katak agenda halo ona kona-ba Conselho de Imprensa, ne'ebé atu hili membro na'in-rua ba Conselho de Empresa ne'e tuir Lei Comunicação Social nian. Maibé, até horissehik lokraik, Mesa seidauk simu hossi Deputados ou Bancada sira sobre candidaturas ba Conselho de Imprensa.

Ami hein hela, Mesa hein hela, atu Bancada sira ou Deputado sira bele submete candidatura mai Mesa para depois bele agenda ba eleição iha próxima semana.

Bom dia ba Sr.<sup>a</sup> Secretária de Estado dos Assuntos Parlamentares.

*Iha biban ne'e Sr.<sup>a</sup> Secretária de Estado dos Assuntos Parlamentares foin to'o iha Sala Plenária no hola posição iha nia fatin.*

Sr. Deputado sira, ita hahú ita-nia Período de Antes da Ordem do Dia.

«1. Pedido de justificação de faltas dos Srs. Deputados Natalino dos Santos Nascimento e Jacinto Viegas Vicente;

2. Leitura de apreciação do relatório da Sr.<sup>a</sup> Deputada Aurora Ximenes relativo à participação no Seminário sobre o Papel dos Parlamentares na Promoção do Direito Humano à Alimentação Adequada na CPLP, em Brasília, de 7 a 9 de julho de 2015;

3. Eventuais declarações das bancadas parlamentares», Bancada FRETILIN;

«4. Intervenções diversas dos Srs. Deputados;

5. Informações da Sr.<sup>a</sup> Secretária de Estado dos Assuntos Parlamentares sobre questões suscitadas por Srs. Deputados».

La iha Período da Ordem do Dia.

Nune'e, ha'u hussu ba Vice-Secretária da Mesa atu lê pedido de justificação de faltas. Halo favor.

**Sr.<sup>a</sup> Vice-Secretária da Mesa** (Ângela Corvelo Sarmento): — Obrigada, Sr. Presidente. Bom dia ba Ita-Boot, Sr.<sup>a</sup> Secretária de Estado dos Assuntos Parlamentares no colega sira hotu.

«Requerimento de justificação de faltas

Ex.<sup>mo</sup> Sr. Presidente do Parlamento Nacional,

Jacinto Viegas Vicente, Deputado ao Parlamento Nacional, pertencente à Bancada do CNRT, vem requerer a V. Ex.<sup>a</sup> que se digne considerar justificadas as faltas dadas à reunião do Plenário e da Comissão no dia 8 de outubro de 2015, por motivo de assunto familiar, o que faz nos termos e para os efeitos previstos nos artigos 8.º, n.ºs 1, alínea b), 2 e 3, e 5.º, n.º 2, da Lei n.º 5/2004, de 5 de maio (Estatuto dos Deputados), e do artigo 10.º, n.º 1, alínea e), do Regimento do Parlamento Nacional (publicado no *Jornal da República*, série I, n.º 40, de 11 de novembro, de 2009).

Data, 12 de outubro de 2015

O Deputado

Jacinto Viegas Vicente».

«Requerimento de justificação de faltas

Ex.<sup>mo</sup> Sr. Presidente do Parlamento Nacional,

Natalino dos Santos Nascimento, Deputado ao Parlamento Nacional pertencente à Bancada do CNRT, vem requerer a V. Ex.<sup>a</sup> que se digne considerar justificadas as faltas dadas à reunião do Plenário nos dias 5 e 6 de outubro de 2015, por motivo de saúde, o que faz nos termos e para os efeitos previstos nos artigos 8.º, n.ºs 1, alínea *b*), 2 e 3, e 5.º, n.º 2, da Lei n.º5/2004, de 5 de maio (Estatuto dos Deputados), e do artigo 10.º, n.º 1, alínea *e*), do Regimento do Parlamento Nacional (publicado no *Jornal da República*, série I, no. 40, de 11 de novembro, de 2009).

Data, 12 de outubro de 2015

O Deputado

Natalino dos Santos Nascimento».

Obrigado, Sr. Presidente.

Sr. **Presidente**: — Obrigado, Sr.<sup>a</sup> Vice-Secretária da Mesa.

Sr. Deputado sira, iha agenda, assunto número 2, Sr.<sup>a</sup> Deputada Aurora Ximenes la confirma nia presença karik?

Sr. **Natalino dos Santos Nascimento** (CNRT): — Sr.<sup>a</sup> Deputada Aurora bá Nova Zelândia.

Sr. **Presidente**: — Sim, tan ne'e assunto número 2 iha agenda ita adia. Tama ba assunto número 3 agenda nian maka declaração política hussi Bancada FRETILIN. Halo favor.

Sr. **Osório Florindo da Conceição** (FRETILIN): — Obrigado, Sr. Presidente.

Bom dia ba Presidente em exercício no colega Deputado sira hotu.

Iha semana rua ka semana ida kotuk bá iha funcionário lubuk ida hussi Ministério do Petróleo e Recursos Minerais mai iha ne'e, ha'u hanoin Deputado sira foti questão balu ba assunto ida-ne'e, então ami tenta buka tuir halo nu'ussá mak lori problema ida-ne'e atu ita buka hodi fó apreciação, então ami halo audiência ho sira no nia resultado mak ne'e.

Iha semana liubá ami hassoru *staff* Instituto do Petróleo e Geologia sira ne'ebé mai iha Parlamento Nacional atu hato'o sira-nia preocupação kona-ba carta notificação ne'ebé sira simu hussi Conselho Diretivo Instituto Petróleo no Geologia hodi hapara sira-nia contrato. Razão hodi hapara contrato tanba iha crise de instituição iha estruturas internas Instituto Petróleo no Geologia nian.

Cronologia ne'ebé sira hato' o mak hanessian tuirmai ne'e: Molok sira sai *staff* ba Instituto Petróleo no Geologia, sira serviço hanessian técnico geólogo iha Secretário de Estado de Recursos Naturais (SERN) iha tinan 2010 to' o 2012 no hetan avaliação hussi Ministério do Petróleo e Recursos Minerais.

*Staff* na'in-haat ne'ebé hassai ka hapara mak hanessian:

1. Sr.<sup>a</sup> Celina Soares Freitas, geóloga sénior iha Divisão de Recursos Minerais;
2. Sr.<sup>a</sup> Diana Fátima da Costa, geóloga sénior iha Divisão de Geologia & *Petroleum Engineering*;
3. Sr. Frederico C. M. dos Santos, geólogo sénior iha Divisão de Recursos Minerais;
4. Sr. Ubaldo de Sousa iha Divisão de Recursos Minerais.

Iha 2012 sira hetan transferência hussi Ministério do Petróleo e Recursos Minerais ba Instituto de Petróleo e Geologia hanessian equipa instaladora.

Iha 28 de julho, Conselho Diretivo hassai resolução ida kona-ba reestruturação no organização interna, regulamento no organização interna ba organograma Instituto de Petróleo e Geologia tanba iha crise de gestão iha estrutura interna instituição ne'e rassik. Loke ona concurso interno ba diretor sira no horas ne'e hein hela resultado, no *staff* na'in-haat ne'e hetan notificação hodi hapara contrato. Tanba sira sente la satisfeito ho notificação ne'e, sira tenta atu ko'alia ho Ministro, maibé tanba la consegue hassoru Ministro, então sira hassoru de'it chefe de gabinete.

Hafoin rona tiha sira-nia opinião no observação ba contrato ne'ebé Instituto de Petróleo e Geologia celebra ho sira no mós haree ba Decreto-Lei n.º 33/2012, ami hakarak hato' o declaração hanessian tuirmai ne'e:

1. Crise ne'ebé acontece iha Instituto de Petróleo e Geologia, Conselho Diretivo tem que assume responsabilidade. Tanbassá mak sira hussik hela crise ne'e acontece iha instituição ne'e rassik?
2. Ema sira-ne'e hetan transferência hussi Ministério do Petróleo e Recursos Minerais hanessian equipa instaladora, tanba ne'e tuir loloos entrega fali ba Ministério do Petróleo Recursos Minerais, la'ós hapara sira hussi serviço hanessian equipa instaladora. E depois de instituição ne'e hamriik ona, hassai tiha fali sira hussi instituição ne'ebé sira rassik mak instala. Iha-ne'e, tuir sira-nia declaração katak ne'e la justo.

Crise ne'e mossu tanba durante mandato Conselho Diretivo ne'e nian, tuir loloos Instituto de Petróleo e Geologia tomak tem que iha reestruturação no submete ba avaliação hotu, e ne'e hahú hussi Conselho Diretivo no *staff* hotu. Kona-ba contrato, Instituto de Petróleo e Geologia termina contrato ba *staff* na'in-haat ne'ebé horas ne'e hanessian geólogo sénior. E iha ita-nia rain, ita buka *jurusan* ida



geologia ne'e custa tebetebes. Sira tama tiha ona ba categoria sénior, maibé ita la continua, e ita recruta fali foun.

Ami preocupa, tanbassá mak ita hassai tiha ema sira geólogo sénior ne'e? Hanessian ita hotu hatene katak ema Timor-Leste ho responsabilidade ba geólogo sénior uitoan de'it, la barak ida! Karik sira halo buat ruma mak la loos, Conselho Diretivo, liuliu Presidente Instituto de Petróleo e Geologia, iha knaar, responsabilidade no dever tomak atu hadi'a e usa poder ne'ebé Decreto-Lei n.º 33/2012 fó ba nia, iha artigo 9.º n.º 1, alínea f) ne'ebé hatete katak «Exercer o poder disciplinar sobre os funcionários de IPG», maibé nia la hala'o nia knaar ida-ne'e ho di'ak to'o hamossu crise institucional iha Institutio de Petróleo e Geologia ida-ne'e.

Ema na'in-haat ne'ebé serviço hahú iha 2012 iha Instituto ida-ne'e, sira-nia contrato renova tinan-tinan, maibé bainhira crise institucional ne'e mossu, la iha explicação ka avaliação kona-ba sira-nia prestação serviço no fó notificação hodi hapara contrato ba sira, liuliu bainhira instituição ne'e hahú hela recrutamento no la tau sira-nia contribuição durante ne'e hanessian consideração ida. Tuir loloos Conselho Diretivo tem que hahú ho avaliação no halo avaliação molok hassai decisão ne'ebé comunica no hapara sira-nia contrato.

Ami hussu atu halo avaliação kle'an ba Instituto de Petróleo e Geologia, bele encaminha ba Ministério competente hanessian Comissão da Função Pública no loke mós investigação, atu nune'e iha futuro dirigente instituição hotu-hotu nian tem que assume nia responsabilidade bainhira sira halo sira-nia knaar ne'e.

Ho nune'e, ami declara no hussu atu Parlamento Nacional hanessian órgão fiscalizador, la'ós de'it ba Orçamento Geral do Estado, maibé ba instituição Estado hotu ne'ebé hala'o ninia mandato e halo implementação ba sira-nia knaar la tuir regra no lei ne'ebé exige. Tanba ne'e, dala ida tan, ohin ha'u dehan, ita-nia *sarjana* sira ne'ebé ko'alia kona-ba geologia, ne'e menos liu. Agora ita preocupa, ita capacita sira, lakon ossan barak durante 2010 to'o ohin loron, depois ita hassai de'it sira, e ita hakarak recruta fali funcionário foun ou *sarjana* foun! Ha'u hanoin, ita lakon tan ossan hira mak ita foin capacita tan ita-nia recurso sira-ne'e atu continua halo exploração ba ita-nia recurso mina-rai ne'e?

Mak ne'e de'it ami-nia declaração Bancada nian.

Obrigado barak ba Sr. Presidente em exercício.

**Sr. Presidente:** — Obrigado, Sr. Deputado.

Sr. Deputado sira, hanessian ita hotu hatene ona, quando la iha Ordem do Dia, ita-nia efetividade Sessão Plenária nian, máximo ne'e horas ida de'it, tan ne'e mak ha'u sei gere, atu nune'e iha tempo ida-ne'e nia laran, bele fó ba Sr. Deputado sira atu halo intervenção. Hanessian horissehik iha ita-nia intervenção primeira, iha preocupação público nian sobre fiscalização Parlamento nian ne'ebé iha opinião barak hatete katak Parlamento ladún tun. Maibé, dala ida tan, ha'u hakarak hatete ba Sr.

Deputado sira, fiscalização ida-ne'ebé Sr. Deputado sira halo ne'e la halo ho oho karau, fahi no bibi hodi halo festa laron-kalan para depois mídia bá no halo publicação e sai iha televisão dehan ida-ne'e mak fiscalização. Ida-ne'ebé Deputado sira halo ne'e, ne'e la halo festa, la tara tais, la hussu povo sira-nia tempo naruk atu prepara tenda boboot hodi simu fiscalizador sira-ne'e. Tan ne'e mak ha'u hanoin katak tempo ba Sessão Plenária ida Período de Antes da Ordem do Dia ne'e tempo ba Sr. Deputado sira atu expressa ka hato'o aspiração povo nian ne'ebé Ita-Boot sira foti diretamente, sem halo festa, sem oho karau, para hetan informação ida-rua.

Sr. Deputado sira, ita hahú ho Sr. Deputado Manuel Gaspar. Halo favor.

**Sr. Manuel Gaspar Soares da Silva (FRETILIN):** — Obrigado, Sr. Presidente.

Bom dia, Sr. Presidente em exercício, componente da Mesa, Sr.<sup>a</sup> Secretária de Estado dos Assuntos Parlamentares, colegas Deputados no rona-na'in sira.

Em primeiro lugar, Sr. Presidente, ha'u secunda declaração política hussi Bancada FRETILIN nian kona-ba situação crise institucional iha ita-nia Instituto do Petróleo e Geologia nia laran.

Segundo, Sr. Presidente ha'u preocupa ho situação, liuliu Timor Telecom nia funcionamento ne'e oinsá ona karik? Iha horissehik no horibainrua, ha'u hanoin ha'u-nia telefone de'it mak enche pulsa la tama, então horissehik ha'u bá iha escritório Timor Telecom nian iha Hotel Timor, afinal ema barak mak bá forma iha-ne'ebá tanba de'it hakarak atu enche pulsa. Horissehik começa dadeer-saan 10h00 to'o 11h00, Timor Telecom nia funcionamento la'o la di'ak e halo cliente sira enche pulsa mós la tama. Ne'e duni, Sr.<sup>a</sup> Secretária de Estado dos Assuntos Parlamentares, por favor haree to'ok ba instituição ida-ne'ebé iha relevância ba assunto ne'e tanba funcionamento Timor Telecom nian halo ita confuso. Iha cidade de'it mak hanessan ne'e ona, satán iha área rural, ha'u hanoin ne'e bele grave liután karik.

Terceiro, ha'u kala questiona iha-ne'e dala tolu ka dala haat ona, liuliu, kona-ba problema bee moos iha Suco Uaitame, Subdistrito Uatulári, Distrito Viqueque ne'ebé ho total orçamento 210 000 USD. E bee moos ne'e tinan 2014 nian, e companhia ida-ne'ebé halo, to'o agora, tinan ida-ne'e atu hotu tan ona, mas bee ne'e la tama iha suco laran e agora ne'e povo la hetan bee. Ha'u la hatene - ne'e oinsá? Depois, iha tempo ne'ebá companhia hamossu documento ida-ne'ebé uluk assinado hussi Administrador Subdistrito Uatulári, Distrito Viqueque, no Diretor SAS (Serviços de Água e Saneamento) Viqueque nian, e ne'e companhia foti tiha ona ossan 100%, maibé agora, atu tama ona ba tinan rua, maibé bee pinga ida mós seidauk tama iha suco nia laran! La hatene, ne'e bainhira ko'alia kona-ba corrupção ka má gestão ka buat sira-ne'e, ne'e oinsá mak ne'e? Ita haree realidade ne'ebé iha ita-nia nação, hanessan ita-nia ex-Ministra, tanba de'it 4000 USD, bá cumpre tiha iha

Gleno. Depois, ho ida 210 000 USD mak agora povo la hetan bee pinga ne'e, la hatene oinsá, Sr.<sup>a</sup> Secretária de Estado dos Assuntos Parlamentares!

Ha'u hanoin ida-ne'e de'it mak ha'u hato'o iha oportunidade ne'e, Sr. Presidente.

Obrigado ba tempo.

**Sr. Presidente:** — Obrigado, Sr. Deputado.

Tuirmai, Sr.<sup>a</sup> Deputada Izilda Pereira. Halo favor.

**Sr.<sup>a</sup> Izilda Manuela da Luz Pereira Soares (CNRT):** — Muito obrigada, Sr. Presidente. Bom dia ba componentes da Mesa, Srs. Deputados, Sr.<sup>a</sup> Secretária de Estado dos Assuntos Parlamentares no rona-na'in sira.

Sr. Presidente, ha'u atu hussu filafali ba Sr.<sup>a</sup> Secretária de Estado dos Assuntos Parlamentares kona ba assunto médico ida iha Zumalai nian ne'ebé ha'u foti tiha ona iha fulan hirak liubá, e novembro agora já faz um ano. Sanção saida mak foti ona, hodi dada to'o tinan ida wainhira ita precisa hela médico? Ita hatene hela, e assunto ne'e ha'u explica ona iha-ne'e katak tanba intimidação iha clínica laran mak nia halai sai. Caso ida-ne'e acontece ba segunda vez ona, e ne'e acontece mós ho Dra. Maria Gusmão, nia mós halai sai lori loos de'it roupa hussi ne'ebá tanba de'it caso ne'ebé hanessan. Ne'e, ho Dr Bernardo mós hanessan. Ha'u rassik buka hatene tiha ona iha Ministério da Saúde, maibé to'o agora seidak iha resposta. Bainhira ita tun ba terreno, ita haree katak sei precisa médicos, e médico sira-ne'e la'ós tanba sira *bandel*, maibé tanba segurança ba sira-nia an mak la iha. E artigo 50.º Constituição RDTL garante katak sira atu serviço, tem que hela seguro iha sira-nia fatin serviço.

Segundo, rona hussi médico balu - naturalmente ida-ne'e loos - katak médico ida naran Valente, nia celebra tiha contrato ho Ministério da Saúde hodi bá foti especialidade hanessan ginecologista, e remata tiha ona, maibé la filafali mai fatin, agora daudaun parece que serviço iha Irian Jaya. Ita investe tiha ita-nia ossan iha-ne'ebá, Ministério ho equipa tomak haree oinsá atu resolve. Ema katuas balu dehan nune'e: iha regime português - ne'ebé ha'u mós sei ki'ik - katak Presidente ho Ministro sira iha tiha tassi-balun ne'ebá, mas problema ida hanessan ne'e la existe, problema ki'ikoan sira-ne'e, resolve lailais de'it. Iha regime indonésio nian mós Presidente ho Ministro sira dook tiha iha-ne'ebá. Agora, ita independente tiha ona, Ministro, Presidente, hotu-hotu iha hela ita-nia matan laran, mas problema sira-ne'e Deputado sira foti ba foti, maibé nafatin de'it. Agora ha'u ko'alia ba saúde, nune'e mós ba problema seluk ne'ebé colega sira seluk foti tiha ona.

Terceiro, iha fulan hirak liubá ha'u haree declaração Vice-Ministro Comércio, Indústria e Ambiente iha televisão katak sei reativa filafali minimercado ne'ebé ita gasta tiha ossan lubuk ida iha tinan hirak liubá. Nune'e, hein katak ida-ne'e realiza duni tuir compromisso Vice-Ministro Comércio, Indústria e Ambiente nian tanba ita la'o bá-mai to'o iha foho, tun fali mai, ita haree bá mercado sira-ne'e sei

atirado hela e ema nia produtos ba han nian sei fa'an nafatin iha estrada laran. Hein katak Sr.<sup>a</sup> Secretária de Estado dos Assuntos Parlamentares buka to'ok resposta hodi fó mai tanba ami precisa hatene.

Muito obrigada, Sr. Presidente.

**Sr. Presidente:** — Obrigado, Sr.<sup>a</sup> Deputada.

Tuirmai, Sr.<sup>a</sup> Deputada Olinda Morais. Halo favor.

**Sr.<sup>a</sup> Olinda Morais (PD):** — Di'ak, obrigada ba oportunidade.

Iha-ne'e ha'u iha preocupação balu atu hato'o, maibé antes atu hato'o, Sr. Presidente em exercício, ba dala uluk ha'u-nia respeito ba V. Ex.<sup>a</sup> Presidente no componentes da Mesa, V. Ex.<sup>a</sup> Secretária de Estados dos Assuntos Parlamentares, colega Deputado sira hotu no audiente tomak, ha'u-nia bom dia ba ita hotu.

Em primeiro lugar, ha'u hakarak hato'o katak iha dia 3 fulan ida-ne'e, ami hussi Distrito Lautém, Deputado balu, halo existe Conselho de Veteranos no halo sorumutu iha Luro Kota ho objetivo hodi socializa existência Conselho ida-ne'e rassik. E ao mesmo tempo iha mós atividade ida hussi equipa interna Município Lautém nian, hussi Associação FOK-FALINTIL (Faluk Oan Kiak-Forças Armadas de Libertação Nacional de Timor-Leste) ne'ebé hala'o hamutuk ho ami, sira-nia organização mós halo socialização kona-ba existência organização FOK-FALINTIL. Iha-ne'ebá sira fahe mós fita luto nacional ba ita-nia comunidade ne'ebé marca presença iha-ne'ebá. E ao mesmo tempo, liuhossi evento ne'e, sira hassoru malu e hakarak conhece malu nu'udar vítima ba funu ukun-rassik an ida-ne'e. Iha momento ne'ebá, ami socializa ami-nian, sira mós socializa existência Associação FOK-FALINTIL, depois ikusmai sira fahe fita luto nacional, maibé iha oan-ki'ak balu, ka mártir nia oan balu, ne'ebé contra luto nacional ne'e. E sira tau questão ba ida-ne'e, ho razão katak sei iha ruin, issin, hussi matebian ka herói sira ne'ebé naklekar no mós iha mártir balu ne'ebé sei hein análise forense no resto mortal barak mak sei iha ossuário, ne'ebe sira propõe katak bele karik considera netik restos mortais ne'ebé iha ossuário, atu nune'e simboliza netik ita-nia Desluto Nacional ne'ebé ita halo iha dia 31 de dezembro, fulan oinmai, tinan ida-ne'e nian. Tanba questão hirak-ne'ebé ha'u rona hussi terreno, Sr.<sup>a</sup> Secretária de Estado dos Assuntos Parlamentares, iha dia 20 de setembro, ha'u halo intervenção ida ne'ebé ko'alia kona-ba restos mortais ne'ebé sei iha ossuário balu, ne'ebé seidak haloot. Tuir ha'u-nia intervenção ha'u ko'alia kona-ba restos mortais, oinsá ita bele haloot, e ne'e la halo festa boboot maibé, pelo menos, haloot restos mortais ne'ebé iha ossuário sira, atu nune'e bele fó valor ka simboliza ita-nia desluto ne'ebé ita atu realiza no marca dala ida tan história povo Timor-Leste nian iha RDTL (República Democrática de Timor-Leste) ka Nação ida-ne'e. Tanba ida-ne'e maka ha'u

hakarak hato'o ha'u-nia intervenção ida-ne'ebé uluk hato'o iha dia 20 de setembro ne'e, ne'ebe, Sr.<sup>a</sup> Secretária de Estado dos Assuntos Parlamentares la iha-ne'e, maibé ninia representante ne'ebé iha, karik tau ona iha agenda. Maibé, ha'u hakarak hussu filafali ida-ne'e, atu nune'e V. Ex.<sup>a</sup> la haluha hato'o ba Ministério competente, tanba ita hotu, ou cidadão Timor-Leste tomak, iha direito no obrigação atu hatene processo saida de'it mak la'o iha nação Timor-Leste.

Ikusliu, ha'u hakarak ko'alia kona-ba carta ida-ne'ebé mai hussi distrito Lautém, hussi oan-kiak desastre Aitana nian, ne'ebé carta ida-ne'e daruak nian. Iha 2014 mós, se ha'u la sala, iha meados de 2014, haruka mós carta ida mai, ne'e primeiro, e ida-ne'e segunda carta. Ne'ebe, ha'u hanoin, carta ne'e iha Mesa Parlamento nian mós iha ona, ne'ebe atu fó hanoin de'it katak, maski ida-ne'e ba dala rua hussi sira-nia pedido ne'ebé hato'o ona, e processo naruk ida, maibé to'o agora ita-nia Estado, ita-nia Governo seidauk fó consideração ka fó liafuan ruma ba sira. Tanba ne'e mak sira ...

**Sr. Presidente:** — Sr.<sup>a</sup> Deputada bele completa? Ne'e tanba tempo.

**Sr.<sup>a</sup> Olinda Morais (PD):** — Ha'u conclui ona, obrigada.

**Sr. Presidente:** — Obrigado, Sr.<sup>a</sup> Deputada.

Sr. Deputado «Mandati», halo favor.

**Sr. David Dias Ximenes «Mandati» (FRETILIN):** — Obrigado, Sr. Presidente.

Saudações ba maluk Deputado sira hotu.

Primeiro ponto ne'ebé ha'u hakarak hato'o iha-ne'e, atu reforça de'it distinto Deputado Osório nian kona-ba julgamento iha Suai. Karik loos, ita-nia vogal ida iha Conselho Superior de Magistratura Judicial ne'e tem que hatene ida-ne'e ou então ita tem que atualiza informação sira-ne'e ba nia para iha sira-nia encontro, nia tem que hassa'e ba reunião para haree irregularidade sira hanessan ne'e, tanba família labele julga família, ne'e labele, ne'e contra teorias direito nian.

Agora, segundo, horissehik mós maluk sira ko'alia kona-ba hospital, e ita mós, se bele, buka hatene to'ok, comissão vinculado buka hatene to'ok Raios X iha ita-nia hospital distrital sira-ne'e iha ka lae. Problema mak quando iha desastre ou buat seluk ruma, sira hetan dificuldade barak tebetebes atu hatene, ou então médico sira iha duni dificuldade atu deteta doença sira-ne'e. Ne'e duni, se bele, ita quando bá halo fiscalização, ita haree to'ok Raios X sira-ne'e iha ka lae. Horissehik mós maluk sira ko'alia kona-ba atitude ita-nia enfermeiro no enfermeira sira iha hospital. Ita lamenta tebetebes, mas, às vezes, acontece duni. Karik bele, profissionais hospitalares sira hanessan ne'e tem que iha duni preparação adequada, porque, às vezes, ema ne'e seidauk mate, maibé ho ita-nia halalok, ita obriga ema ne'e hodi mate.

Ida seluk fali mak ha'u hakarak ható'o iha-ne'e mós, ne'e kona-ba água potável. Ita-nia maluk sira iha Taibessi sempre hakilar, lamenta kona-ba água potável, mas Ita-Boot sira agora sa'e bá, liu hossi Taibessi atu bá fali cemitério foun ne'e, iha mota ne'ebá, bee ne'e suli hela de'it, e ne'e quase iha um mês atrás mak ha'u nota buat ne'e. Bee ne'e, iha dadeer-saan suli hela de'it, ne'e la loos! Se bele, ema sira ne'ebé serviço ba ida-ne'e iha responsabilidade uitoan, porque balu terus tanba bee, maibé balu halimar ho bee, ne'e labele, ne'e injustiça boot!

Ida seluk tan fali, ha'u-nia haree kona-ba ita iha-ne'e ne'ebé hotu-hotu preocupa ho ita-nia ossan mina-rai nian, e ne'e kona-ba halo nu'ussá mak ita bele buka fali receitas alternativas para labele ita iha esbanjamento ba ita-nia ossan mina-rai nian. Por exemplo, fornecimento de combustíveis ba ita-nia Estado, tan saida mak la'ós Estado mak kaer de'it ou então através duma empresa pública, mas ita fó fali ba empresa privada sira mak kaer?! Se bele, ita revê fali to'ok contrato sira-ne'e para ita-nia empresa pública sira-ne'e mak kaer fornecimento sira hanessan ne'e, e ne'e por exemplo, ba eletricidade ou então água potável. Ha'u-nia haree ne'e bele karik, porque iha-ne'ebá ita bele hetan mós acréscimo de receitas do que, ki'ik ka boot, bá foti mak iha fundo petrolífero, Ne'e tinan-tinan de'it, bá foti iha-ne'ebá.

Ha'u-nia hanoin ida-ne'e de'it mak ha'u bele ható'o. Sr.<sup>a</sup> Secretária de Estado dos Assuntos Parlamentares - oh! Mai ona! - se bele, hakerek mós ho ida-ne'e, tau to'ok proposta ne'e iha Conselho de Ministros ne'ebá, porque ita iha-ne'e fó han ema balu para moris iha *langit yang ketujuh*, maibé balu *bernapas* hela *di bawah lumpur*.

Obrigado, Sr. Presidente.

Sr. **Presidente**: — Obrigado, Sr. Deputado.

Tuirmai, Sr.<sup>a</sup> Deputada Fernanda Lay. Halo favor.

Sr.<sup>a</sup> **Maria Fernanda Lay** (CNRT): — Muito obrigada, Sr. Presidente.

Ha'u iha assunto tolu mak ha'u atu ko'alia: ida, kona-ba IPG, ou Instituto de Petróleo e Geologia, ne'ebé ohin Sr. Deputado Osório foti. Ha'u atu ható'o de'it katak la'ós ema na'in-haat, mas são 14 pessoas ne'ebé faz parte iha comissão instaladora. Imagina to'ok, Srs. Deputados, ita hassai ema na'in-14 hodi contrata ema foun! Tanbassá mak ha'u hatete ida-ne'e? Ne'e ironia. Estado ho parceiros de desenvolvimento gasta orçamento para fó capacitação ba sira durante tinan tolu, e entretanto assunto kona-ba capacitação ne'e, iha relatório do Ministério do Petróleo e Recursos Minerais ne'ebé ható'o mai Parlamento relativo ao ano 2013 mós iha-ne'ebá hela.

Tuirmai, IPG ne'e, tuir informação ne'ebé ha'u simu no hetan, hatete katak funcionários iha-ne'ebá ne'e funcionário semipúblico ho semiprivado. Ha'u la entende como é possível numa instituição do

Estado, funcionário ne'e recrutado ou permanente? Labele fali semiprivado, e labele semipúblico. Ha'u hato'o ida-ne'e tanba férias ne'ebé sira hetan são 20 dias ne'ebé liga ho decreto que ha'u foti iha-ne'e iha semana liubá. Ne'e são 20 dias, então é sinal de que sira funcionário público. Como é que ita bele hatete katak sira la'ós funcionário público?

Segundo, kona-ba Conselho Diretivo, ne'e *rangkap*, katak acumula ho presidência ba IPG. Ha'u fó exemplo muito concreto, GOPAC (*Global Organization of Parliamentarians Against Corruption*), ne'e hanessan instituição ki'ik, maibé nia iha Conselho de Administração e iha mós Comissão Executiva ou Conselho Executivo para bele controla. Ne'e Conselho Executivo halo proposta e Conselho de Administração aprova. Entretanto, iha instituição IPG la iha diferença, tanba sira na'in-tolu acumula função ne'e hotu. Agora, sé mak controla sé? Será que o Ministério do Petróleo e Recursos Minerais não tem capacidade de ficar como Conselho Diretivo? Pelo menos, Sr. Presidente, ne'e mak sira ne'ebé tuur ona iha IPG.

Terceiro, ha'u atu hussu ba Sr.<sup>a</sup> Secretária de Estado dos Assuntos Parlamentares, anomalia kona-ba manual de formação dos professores ne'ebé ha'u foti iha-ne'e, mais ou menos to'o agora iha ona resultado? Tanba se lapso ha'u-nian, e keta ha'u mak seidauk haree katak iha resposta karik, ha'u hussu, se bele, fó informação ne'e. E ne'e inclui mós avô Xavier nia rate ne'ebé sai *gudang* ba restos mortais heróis nacionais nian ne'ebé ha'u deteta iha enterro do Sr. La Sama, ne'ebé ami mós ba iha-ne'ebá.

E por último, ha'u atu fó hanoin de'it, Sr. Presidente, talvez kona-ba Lei de Proteção dos Consumidores, ha'u conforma ho ita-nia assessor sira katak pronto ona, ne'e para pelo menos bele fó lembra ba ita atubele conclui serviço ida-ne'e, ainda dentro desses últimos meses, antes de ita tama ba Orçamento Geral do Estado. Ne'e tanba sira pronto hela! Entretanto, iha comissão rua ne'e, talvez ami tem que organiza malu para bele continua discussão ne'ebé hala'o tiha ona iha Maubara.

Muito obrigada.

Sr. **Presidente**: — Obrigado, Sr.<sup>a</sup> Deputada.

Tuirmai, Sr.<sup>a</sup> Deputada Anastácia Amaral. Halo favor.

Sr.<sup>a</sup> **Anastácia da Costa Amaral** (FRETILIN): — Obrigada, Sr. Presidente. Bom dia ba Ita-Boot, Sr.<sup>a</sup> Secretária de Estado dos Assuntos Parlamentares, Mesa, distinto Deputado sira no mós rona-na'in sira.

Primeiro, ha'u hakarak secunda declaração ne'ebé horissehik ha'u-nia camarada na'in-tolu hato'o ona, liga mós ba projeto ZEESM nian.

Segundo, atu secunda mós declaração ne'ebé hato'o hussi Bancada FRETILIN, e precisa mós atu haree situação ida-ne'e. Se bele, recomenda ba Governo atubele bolu instituição competente atu mai hatán para ita hatene claro liu tan informação sira-ne'e.

Terceiro, atu liga uitoan ba projeto emergência 2013 nian, Sr.<sup>a</sup> Secretária de Estado dos Assuntos Parlamentares, no ponte ou *bronjong* ne'ebé halo iha Viqueque, iha ponte Pires nian. Iha momento ne'ebá comissão rassik to'o iha fatin ne'ebá no hatete katak precisa halo estudo didi'ak atu nune'e bele continua projeto ida-ne'e, maibé atu hussu to'ok, instituição ida-ne'ebé mak iha laran hodi haruka companhia sira halo projeto ne'e, e to'o ikus, sira dehan: «Nu'ussá mak uluk comissão quando to'o iha fatin, la haruka ami hapara serviço ne'e?». Ha'u hanoin katak ida-ne'e la'ós competência Parlamento nian, maibé atu recomenda katak karik hanessan ne'e duni, halo estudo didi'ak, desenho ida ne'ebé di'ak, plano ida ne'ebé di'ak, atu nune'e tau montante orçamento ne'ebé normal, selae mak tinan haat ka lima ita sei hakilar nafatin kona-ba projeto emergência. Sé mak iha laran? ADN mak iha laran ka Ministério das Obras Públicas mak iha laran? Depois, to'o fim, dehan katak Ministro das Obras Públicas la hatene, maibé projeto ne'e quase atu bessik final ona. Sr.<sup>a</sup> Secretária de Estado dos Assuntos Parlamentares, ida-ne'e importante tebes.

Quatro, atu hatete mós katak bainhira loos mak ha'u hein resposta, maibé serviço ne'e la'o daudaun ona, e ne'e liga uitoan ba estrada ne'ebé ha'u levanta beibeik ba Sr.<sup>a</sup> Secretária de Estado dos Assuntos Parlamentares mak kona-ba estrada Hudi Laran nian. Ne'e ha'u hakarak hatene de'it, ida-ne'e nia plano ba estrada nia luan ne'e hira? Ne'e 12 m ka 14 m? Uluk ne'ebé sira hatete ne'e, ha'u rassik hamriik iha estrada no ko'alia ho técnico Ministério das Obras Públicas nian no técnico Secretaria de Terras e Propriedades, sira hatete katak: «Oh, S. Ex.<sup>a</sup> ami sei to'o fali mai iha terreno, e sei explica fali ba sira katak ida-ne'e seidauk implementa». Maibé, ne'e companhia implementa daudauk ona, suru tiha rai, taka filafali. Ha'u la hatene, ida-ne'e keta hein orçamento 2016 nian karik? Precisa atu tau mós atenção ba ida-ne'e.

Ita hatene katak rai-henek iha mota Wetuku nian, iha Viqueque, bainhira comissão lori to'o iha laboratório nacional, haree katak rai-henek ida-ne'e número um iha Timor laran, e maski ema sira, dalaruma, bá suru rai-henek iha-ne'ebá, maibé to'o agora la iha receita ida mak tama. Tuir explicação chefe suco ne'ebé competente iha suco Bahalaruain nian hatete katak ne'e precisa atu cria decreto-lei ruma atu sira bele la'o tuir, sira la bele obriga ema atu fó sira-nia contribuição bainhira la iha base legal ida.

Ikusliu, atu recomenda ba Governo atu hare to'ok ba companhia tolu hanessan Timor Telecom, Telkomcel ho Telemor, ne'ebé dala barak sira-nia cartão SIM (*Subscriber Identity Module*) fa'an arbiru de'it. Ita precisa tau regras para usa cartão eleitoral hodi identifica, atu nune'e iha problema ruma, ita buka ne'e fácil, selae hanessan agora daudauk, Sr.<sup>a</sup> Secretária de Estado dos Assuntos



Parlamentares, iha momento ne'ebé Parlamento iha recesso hela, iha problema ida, katak ita-nia jovem balu, ne'e la'ós jovem hotu-hotu, maibé ema balu que usa mafioso sira hodi manipula labarik sira, hodi dehan katak fó ossan atubele *tes* para sai funcionário. Depois ema ne'e mós hatete katak nia residêcia ka nia serviço fatin maka iha CNJTL (Conselho Nacional da Juventude de Timor-Leste), iha Secretaria de Estado da Juventude e Desporto, e no fim labarik sira, quase 16 pessoas, to'o iha-ne'ebá hodi buka ema ne'e no hussu ba funcionário CNJTL nian, e sira hatete: «Oh desculpa, iha-ne'e la iha!». Secretário de Estado da Juventude e Desporto dehan: «Iha-ne'e la iha funcionário ida hanessan ne'e ne'ebé serviço iha-ne'e». Ha'u hanoin katak ida-ne'e precisa mós atu cartão SIM ne'ebé fa'an iha loja sira-ne'e, ha'u hanoin, labele fa'an arbiru de'it iha estrada. Ne'e precisa fa'an iha fatin ida para bainhira ema bá hola precisa regista sira-nia cartão identidade, selae iha problema sira hanessan ne'e, ita buka tuir ema mós ita la hetan. Ha'u hanoin katak ne'e ita cuidado mós, liuliu ba instituição sira ne'ebé iha. E ha'u hanoin katak mafioso sira usa ema sira-ne'e hodi halo buat sira ne'ebé arbiru de'it, orsida instituição mak hetan fali problema boot.

Ha'u hanoin ida-ne'e mak ha'u hakarak hato'o iha momento ida ne'e ba Sr.<sup>a</sup> Secretária de Estado dos Assuntos Parlamentares.

Obrigada ba tempo.

**Sr. Presidente:** — Obrigada, Sr.<sup>a</sup> Deputada.

Tuirmai, Sr. Deputado César «Piloto». Halo favor.

**Sr. César Valente de Jesus** «Piloto» (CNRT): — Obrigado, Sr. Presidente em exercício. Bom dia ba Ita no componente da Mesa, S. Ex.<sup>a</sup> Secretária de Estado dos Assuntos Parlamentares no colegas Deputados hotu.

Foin iha semana liubá, ou semana kotuk, ita hassoru malu ho Ministro das Obras Públicas, maibé lora hira ne'e ha'u haree companhia ida-ne'ebé kaer estrada Tibar bá Liquiçá nian, ha'u haree rai-lolon sira ne'ebé dodok ka namdoras ne'e sira tau fali *bronjong*, depois arame oan ne'e, ha'u haree ki'ik demais. Ne'e ita-nia alvo ne'e ba tinan hira? Ba cinco anos de'it, nia aat fali ona, então pronto, ne'e ita classifica ba emergência, mas se ida-ne'ebá ne'e ba 20 a 30 anos ne'ebé mai, ne'e tem que halo monotorização ida ne'ebé di'ak e fiscaliza para bele obriga companhia ne'e hodi sobu ou halo fali ida-ne'ebé ita haree katak bele iha duração ida-ne'ebé kleur. Ha'u haree katak iha-ne'ebá ne'e, udan mai agora, rai sira-ne'e namtate tun mai no dudu monu hotu *bronjong* sira-ne'e. Agora companhia sira ne'ebé hetan crítica maka'as, ne'ebé ulu-uluk dehan katak maun boot Xanana bolu no fó de'it ne'e, companhia sira-ne'e ita haree sira halo qualidade ne'ebé di'ak. Ne'e mak hanessan BTK (*Bhakti Timor Karya*). BTK ne'e ema hotu-hotu dehan katak nia ne'e saida, maibé agora ninian ne'e, ita haree katak tessik ba Carimbala ne'ebá ne'e maski iha risco boot mas ninia construção ne'e ita

haree katak dura. Agora, ida-ne'ebé iha hela rai-tetuk ne'e mak halo sabraut hela hanessian ne'ebá ne'e. Ha'u la hatene, se ne'e ministro mak lakohi bá haree ka, ou técnico hussi ADN (Agência de Desenvolvimento Nacional) mak lakohi bá haree ka, ha nu'ussá? Ne'ebe, hussik hela ba companhia ne'e halo conforme nia hakarak loos hanessian ne'ebá. Ha'u hanoin ida-ne'e tem que haree.

Segundo, ha'u mós la simu quando ha'u haree capitalista sira duni sai cidadão sira hussi fatin sira ne'ebé sira hela tinan barak tebetebes. Ha'u apoia Sr. Presidente da República nia liafuan katak nação ida-ne'e ba Timoroan hotu-hotu, tanba ne'e mak ha'u hanoin katak Estado tem que ser responsabiliza, labele duni cidadão sira hanessian buat aat. Ita haree, iha Ai-Tarak Laran ne'e loloos ema sai ona, mas tanba Estado respeita hela nia cidadão sira mak hodi buka dalan neineik atubele hassai ho dalan ida-ne'ebé digno. Agora ema sira ne'ebé iha ossan barak, rai ne'e fa'an tiha ona mós mai foti filafali. Tribunal, tanba dehan katak independente ona be, la haree ona katak Tribunal ne'e mós órgão ida hussi Estado, e oinsá mak bele garante cidadão sira-nia direito, respeito ba cidadão sira no fó valor ba cidadão sira tuir Constituição ne'ebé hatete katak cada família iha direito atu hetan fatin ida. Tanba ida-ne'e mak, ha'u hanoin, Estado tem que ser responsabiliza tuir buat ne'ebé Constituição hatete, katak Estado tem que garante fatin ida ba cidadão hotu-hotu ka família hotu-hotu. Se ita hakerek de'it iha Constituição katak Estado garante, respeita, ou fó fatin ba cidadão ka família ida atu hetan fatin iha Nação ida-ne'e, mas agora bá duni hela hanessian ne'ebá, no ema ida-idak bá buka nia fatin, ha'u hanoin ne'e injustiça social ida que boot tebetebes. E ne'e bele prepara hela bomba tempo nian ida iha oinmai, aban-bainrua nia bele rebenta. Quando duni beibeik ema sa'e ba foho-lolon, ne'e uluk FRETILIN moris mós tanba ida-ne'e duni. Nia haree katak ema Timoroan sira la iha tiha ona direito ba sira-nia rain, então FRETILIN moris para lori Timoroan sira-nia direito ne'e bá hetan autodeterminação. E ohin loron hetan tiha autodeterminação, Estado ida-ne'ebé moris hussi opressão, moris hussi intimidação mak halo filafali hanessian ne'e ba cidadão sira. E depois, ita-nia princípio ne'ebé ita defende ne'e sai oinsá? Ita hakerek iha Constituição ne'e furak tebetebes, mas praticamente ita fó valor ba ema sira ne'ebé iha capital boboot sira para duni ema ki'ikoan sira. Sim senhor, ita la admite cidadão sira atu mai halo barraca oan iha andar sira-nia leet, mas Estado mak tem que ser responsabiliza no garante cidadão sira-nia direito. Ha'u hatete, di'ak liu Governo haree, la bele julga kona-ba lei rai ne'e tanba lei rai nian seidauk iha. Se oho malu tan rai, então julga ema sira ne'ebé oho malu ne'e, tanba ne'e crime ida. Crime ne'e buat ketak ida, mas rai ne'e la bele julga lai. Ha'u hanoin ne'e injustiça boot! Tanba lei rai nian seidauk iha, e ita julga tiha, depois aban-bainrua lei rai ne'e mossu mai mak contraria fali ho buat ne'ebé halo tiha ona julgamento, ne'e oinsá? Ne'e Estado rassik mak ke'e rai-ko'ak ba nia an para hakoi an.

Ha'u hanoin ida-ne'e de'it mak ha'u hakarak foti iha intervenção ba loron ohin.

Obrigado.

Sr. **Presidente**: — Obrigado, Sr. Deputado.

Tuirmai, Sr.<sup>a</sup> Deputada Benvinda Rodrigues. Halo favor.

Sr.<sup>a</sup> **Benvinda Catarina Rodrigues** (FRENTI-MUDANÇA): — Obrigada ba Sr. Presidente em exercício.

Bom dia ba Ita-Boot, componente da Mesa, colega Deputado sira no mós Sr.<sup>a</sup> Secretária de Estado dos Assuntos Parlamentares.

Ha'u iha assunto rua ne'ebé atu ko'alia: primeiro, assunto ida-ne'e, Sr.<sup>a</sup> Secretária de Estado dos Assuntos Parlamentares, ha'u ko'alia tiha ona dala rua, e iha dia 3 mós ha'u ko'alia iha-ne'e, maibé ha'u seidauk hetan resposta hussi Ministério. Ne'e ha'u atu ko'alia tan kona-ba fatin Cristo Rei no mós Amo-Papa nian, e ne'e la'ós ko'alia ou rona de'it, mas na realidade haree ho matan, tanba ita haree katak semana-semana ita-nia população no *visitor* barak mak bá iha-ne'ebá, e sira balu bá halo festa, dança no halo atividade oioin, liuliu iha estação ne'ebé tau iha-ne'ebá. Ita-Boot sira hatene katak loron Páscoa, ita iha cristão balu ne'ebé bá reza terço iha-ne'ebá, tuir loloos tem que respeita fatin ne'ebá, tanba fatin ne'ebá sagrado. Ita haree katak tau Jesus Cristo nia estátua iha-ne'ebá, nune'e sai hanessan fatin histórico mós ba ita. Tuir loloos ita-nia Ministério do Turismo mak halo plano, tanba fatin ne'ebá iha governação AMP (Aliança Maioria Parlamentar) nian, ita mak tau ossan hodi hadi'a. Agora, hanu'ussá mak atu continua conserva ho di'ak, ne'e ita mós precisa iha plano ida ne'ebé adequado para ita continua halo proteção ba nia, cuida nia, hodi nia di'ak nafatin.

Uluk ha'u ko'alia katak uma ki'ikoan sira-ne'e, ne'e ai sira ne'ebé nahe iha okos começa tohar ona tanba semana-semana ema sira ne'ebé bá halo passeio dança iha leten, bidu iha leten. Sira mós soe fo'er arbiru de'it, muro ne'ebá mós sira choque tohar hotu; lori motorizada sira bá halo *cross* ka dada *motor* iha-ne'ebá, e muito rame, dalaruma ita la'o mós sai la di'ak no casa de banho mós aat tebetebes. Agora daudauk iha Cristo Rei nia kotuk, iha fatin ne'ebé ita atu sa'e bá leten, iha kotuk ne'e fo'er la halimar, ne'e ha'u rassik mak bá iha-ne'ebá hodi haree. Ha'u hanoin, di'ak liu Ministério iha plano atu hadi'a ona.

Visita estudo comparativo nian iha rai-li'ur nian mós ita halo: Ne'e mak hanessan iha Brasil, Rio de Janeiro, bainhira ita atu tama bá visita tem que selu 13 USD, e sira-nia ossan ne'e real. E depois ita to'o iha leten mós iha sira-nia sassán oioin ne'ebé sira fa'an iha-ne'ebá, ita bele sossa, ne'e hatudu katak aumenta receita ka retorno ba Estado liuhossi plano ida-ne'e ne'ebé sira cria. Tuir loloos ita mós questiona beibeik ba ita-nia taxa doméstica, katak iha tinan-tinan ossan ne'e la aumenta, e ossan ne'e mai oin ida de'it, mai hussi APORTIL (Autoridade Portuária de Timor-Leste), mas ossan ne'e mós la suficiente ka número ne'ebé aumenta ne'e ki'ik liu. Então, saida mak Ministério precisa halo? Ministério precisa iha plano atu hadi'a ida-ne'ebá. E ita mós bele tau ba *visitor* ema rai-li'ur nian, mais

ou menos 3 USD ou 5 USD. E ba ema rai-laran, tanba nia bá semana-semana, nia bele contribui 50 cent ka *quarter*, ne'e depende ba Ministério nia plano. Ha'u hanoin ida-ne'e mak ita precisa halo.

Iha fatin Amo-Papa nian mós começa aat e ai-horis balu ne'ebé kuda iha-ne'ebá começa mate. Iha fatin ne'ebé estátua Amo-Papa nian hamriik bá ne'e, iha escada ne'e ema bá halai no balu hakerek aat. Ha'u hanoin, Ministério do Turismo tem que haree ba assunto ida-ne'e. Ne'e importante liu! Tanba ita mós bele halo ita-nia panfleto, hakerek história iha-ne'ebá. Ita-nia organização feto sira bele bá fa'an acessórios sira iha-ne'ebá, ne'e *visitor* sira ne'ebé sempre bá iha-ne'ebá ne'e, sira hola. Ida-ne'e mós katak sira mós hola parte iha Estado ida-ne'e atu contribui taxa ba Estado, tanba ne'e ida-ne'e hanessan política ida, katak *politik bisnis* ne'ebé ita fó ba ita-nia comunidade.

Segundo, Vice-Presidente e Secretária de Estado, dala balu ita liu iha ita-nia estrada protocolo sira-ne'e, carreta *truck* sira ne'ebé lori *kerikil* ou rai-henek sempre nakfakar nakonu iha estrada sira. Karik bele, liuliu Ministério das Obras Públicas, tem que halo decreto-lei ruma atu regula ba serviço ida-ne'e. Tanba saida? Ita tem que fó sanção ba ita-nia ema sira, atu hanorin sira, para sira mós cuidado, tanba ita-nia cidade ne'e tem que moos. Se quando nakfakar nia tem que tun no ra'ut, quando nia lakohi ra'ut, ita iha lei, iha regulamento ne'ebé ko'alia iha-ne'ebá katak bainhira ó tula rai-henek ka fo'er ka *kerikil*, ne'e quando nakfakar iha cidade laran no monu tuituir dalan, Ita-Boot tem que responsabiliza, katak precisa fó sanção tuir decisão saida mak Ministério ou Conselho de Ministros foti.

Ha'u hanoin ida-ne'e mak ha'u hakarak ko'alia, karik assunto ne'e importante, precisa mós atu fó atenção.

Muito obrigada.

**Sr. Presidente:** — Obrigado, Sr.<sup>a</sup> Deputada.

Tuirmai, Sr. Deputado Natalino dos Santos. Halo favor.

**Sr. Natalino dos Santos Nascimento (CNRT):** — Obrigado ba tempo.

Bom dia ba Sr. Presidente, Mesa no Sr.<sup>a</sup> Secretária de Estado dos Assuntos Parlamentares.

Ha'u sente katak ha'u iha questão ida que precisa ha'u foti tan iha-ne'e, tanba assunto ne'e importante liu, kona-ba polícia UPF (Unidade de Patrulhamento da Fronteira) sira-nia condições, liuliu, primeiro, iha rádio de comunicação. Será que iha PNTL (Polícia Nacional de Timor-Leste) la bele hola rádio de comunicação ba ita-nia polícia UPF sira ne'ebé iha fronteira ne'ebá? Durante ne'e sira halo comunicação ho de'it telemóvel. Ida-ne'e condição ida que grave tebetebes, se ita tau sira iha-ne'ebá mak iha buat ruma, atu halo comunicação ne'e custa. Depois, sira halo comunicação ho telemóvel e usa sira-nia *pulsa* rassik. Ha'u hakarak foti questão ne'e, embora questão ne'e dehan katak

ko'alia iha-ne'ebá, mas ida-ne'e tem que haree duni, e ne'e hakarak ka lakohi. Hola de'it *radio call* la bele para halo comunicação entre posto ho posto?! Ida-ne'e problema boot! Uluk Comandante Longuinhos, agora mai Júlio Hornay, ha'u hakarak atu iha orçamento tinan ida-ne'e, liuliu iha orçamento polícia nian, tem que iha ona rádio de comunicação ba polícia UPF iha fronteira. Ida-ne'e importante! Segundo, polícia sira UPF hanessan mós *pasukan* ne'ebé iha, sira-nia ossan hahán, loron ida sira hetan 6,50 USD, ne'e ba dadeer, meio-dia ho kalan, mas fulan mak sira foin simu. E hassai tiha 12 USD para tau hamutuk hodi sossa foos, e hassai tan 14 USD para tau hamutuk hodi selu cozinheiro. Gestão saida mak hanessan ne'e? Ida-ne'e problema boot ne'ebé sira hassoru, e ha'u precisa foti tan iha-ne'e, ha'u hussu ba Comissão B atu haree assunto ida-ne'e. Até polícia sira ne'ebé iha-ne'ebá, sira *jaga* tiha ona fronteira, sira rassik mak te'in, e ossan ne'ebé 6,50 USD ne'e mak sira hassai hodi selu cozinheiro e hassai hodi hola foos. Ida-ne'e problema ida, tanba ida-ne'e mak ha'u hussu atu haree, tanba assunto ne'e importante, liuliu rádio de comunicação. Tanba ne'e iha AMP ninia tempo ne'e ha'u foti tiha ona, mas to'o agora comandante ida troca tan comandante ida tan, mas to'o agora atu hola de'it *radio call* ka *HT (Handy Talky)* ne'e mós la bele. *Security* Maubere nian iha, maibé polícia PNTL, liuliu UPF, nian la iha. Ida-ne'e questão ida que ita haree katak la iha vontade no hakarak atu haree sassán sira-ne'e.

Segundo, ko'alia kona-ba condições lei rai nian, labele halo lai julgamento. Ha'u hakarak foti tan questão ne'e iha reunião Líderes das Bancadas Parlamentares nian. Ha'u hussu atu Secretária de Estado dos Assuntos Parlamentares atu regista, bainhira mak submete lei ordenamento território mai Parlamento? Bainhira ita ko'alia kona-ba população sira ne'ebé hela arbiru, ne'e tanba ita seidauk define didi'ak sassán sira-ne'e. Tanba ida-ne'e mak iha Tassitolu ne'ebá ita haree katak aban bainrua fó hela despesa boot ida ba Estado, karik aban bainrua atu halo desenvolvimento ruma. E agora daudaun iha Tassitolu ne'e, loloos hanessan fatin ida para aban bainrua atu atraí turista sira, e ita bele desenvolve fatin di'ak iha-ne'ebá, mas agora iha-ne'ebá ema halo tiha uma, e halo uma tama to'o tiha iha tassi laran. Questão ne'e foti beibeik ona iha-ne'e, mas oinsá Governo nia decisão, liuliu Secretário de Estado ou Ministério da Justiça, atu haree ba assunto ida-ne'e? Tanba ida-ne'e mak ha'u hussu para lailais, e lei de ordenamento do território tem que haruka ona mai para depois ita bele haree hodi discute ona lei rai nian, ho nune'e bele garante ona direito povo nian.

Kona-ba jardim sira-ne'e, precisa duni atu haree. Ita haree katak consciência cidadão nian mak, ha'u hanoin, seidauk iha karik, tanba Estado investe tiha iha jardim sira-ne'e hodi tau ahi halo didi'ak, maibé lampu sira-ne'e, labarik sira bá halimar baku rahun tiha. Ida-ne'e precisa duni atu iha educação cívica, liuliu iha administrador distrito sira ka ou município sira, atu fó-hatene ba administrador, posto administrativo, chefe suco sira kona-ba oinsá atu explica ba nia comunidade sira atubele protege ou sira mós mak bele assegura tanba sassán sira ne'ebé iha-ne'ebá ne'e halo ba bem estar público nian e comunidade sira iha direito atu cuida.

Kona-ba questão ne'ebé ohin Deputada Benvinda foti, ida-ne'e importante tebetebes tanba ita haree condições iha Cristo Rei ne'e, ne'e ita tau ossan boot hodi halo fatin ida-ne'ebá, maibé iha condição ida que péssimo ka aat liu. Bainhira ita bá iha casa de banho sira-ne'e, ita haree ita mak ta'uk fali. Tanba ida-ne'e mak precisa atu haree assunto ne'e.

E problema mak ne'e, ita tau ossan iha Ministério do Turismo, mas iha Ministério da Administração Estatal mós hakarak atu saneamento ne'e sira mak tem que kaer. Ida-ne'e mak ita haree katak sai problema. Ne'e oinsá mak ita define? Se ita hakarak halo turismo didi'ak, ossan ne'e ita tau ba Ministério do Turismo para nia mak atu haree kona-ba limpeza sira-ne'e. Ou ita fó ba Ministério da Administração Estatal atu haree ida-ne'e. Agora, se ita hatete ne'e Ministério do Turismo nian, mas Ministério da Administração Estatal mak kaer buat ne'e, orsida hadau malu, iha problema, serviço la la'o, e buat ne'e mak halo sai runguranga hanessian ne'e. Tanba ida-ne'e mak ita haree didi'ak, define didi'ak, liuliu, se jardim sira-ne'e Ministério do Turismo nian, então tau ninia manutenção no buat hotu iha Ministério do Turismo ne'ebá. Ne'e para depois nia bele fó manutenção ka nia *pemeliharaan* ne'e iha-ne'ebá. E *security* sira-ne'e mós tem que haree hussi fatin ida de'it para depois bele iha controlo ida-ne'ebé di'ak, selae *security* sira mai hussi fatin seluk, e sira la bele halo coordenação tanba sassán ne'ebá ne'e Ministério do Turismo nian. Nune'e, precisa atu iha coordenação ida ne'ebé di'ak atubele fortalece cidade Díli ne'e hodi sai cidade ida que moos, selae ita haree katak ne'e cidade ida que runguranga liu.

Ikusliu, dala ida tan hussu atu submete lailais lei do ordenamento do território.

Obrigado.

Sr. **Presidente**: — Obrigado, Sr. Deputado.

Sr. Deputado sira, horas ida liu ona, sira ne'ebé regista iha-ne'e sei iha Deputado lubuk ida. Se Ita-Boot sira autoriza, bele completa tiha de'it, mas se hakarak *konsisten* hanessian ha'u consistente ho horas ida, então ita para.

Sr.<sup>a</sup> Deputada Fernanda Lay, halo favor.

Sr.<sup>a</sup> **Maria Fernanda Lay** (CNRT): — Sr. Presidente, atu fó-hatene de'it katak Comissão C iha auditoria ne'ebé Câmara de Contas hato'o mai, iha parte loraik ami iha agenda ba audiência ida para bele remata molok ita tama ba Orçamento Geral do Estado.

Muito obrigada.

Sr. **Presidente**: — Sr. Deputado sira, iha ponto de ordem: Sr. Deputado Francisco Branco. Halo favor.

Sr. **Francisco Miranda Branco** (FRETILIN): — Sr. Presidente, bom dia e obrigado.

Sr. Presidente, atu hussu de'it tempo uitoan hodi ko'alia kona-ba hapara contrato iha Instituto de Geologia. Ami-nia Bancada sei tetu hodi avança ba inquérito parlamentar ida ba caso ida-ne'e, tanba ami haree katak ida-ne'e hatudu momoos katak iha abuso de poder. E mai confirma, tuir informação ne'ebé to'o ami-nia fatin katak iha Ministério ne'ebé tutela ne'e iha prática familiarismo, compadrio, ne'ebe, mai confirma de'it situação real ida-ne'ebé acontece iha-ne'ebá.

Sr. Presidente em exercício, karik bele fó tan tempo ida, e ami hakarak hussu auditoria ba *free balance*, hanessan sistema ne'ebé Estado gasta ossan barak ona. Ministra das Finanças iha tempo ne'ebá lori promessa barabarak mai ita iha Parlamento Nacional ida-ne'e, embora ita iha dúvida, maibé nia insiste nafatin e to'o ohin lora sistema ida-ne'e seidauk ajuda didi'ak hodi halo gestão ba finanças públicas ka ossan Estado nian. E ami repara mós, to'o ohin lora, depois de tempo naruk, seidauk iha transferência de tecnologia ba timoroan sira, tanba sira fó de'it transferência de conhecimentos básicos ba atendimento cliente de'it, e ba sistema nian ne'e hanessan fali segredo ida ba sira. Ne'ebe, entre aspas “iha mafia balu iha-ne'ebá”. Então, ami-nia bancada hanoin katak ami sei halo proposta para halo auditoria ida ba sistema ida-ne'e, sistema ida ne'ebé ita gasta ossan barak. Instala programa ne'ebé, Sr. Presidente em exercício, la tuir necessidade real ita-nian hodi lori ita bá gasta ossan barak e to'o ohin lora ita seidauk bele tama iha sistema ne'e nia laran. Ne'ebe, situação rua ne'e halo ami-nia bancada preocupado, e ami sei tetu hodi avança ho inquérito parlamentar ida ba Instituto de Geologia tanba, ha'u repete filafali, hatudu claramente katak iha abuso de poder. E ami mai confirma de'it informação ne'ebé to'o ami-nia fatin katak iha sistema compadrio ou familiarismo iha situação ida-ne'e. Tanba lamentável tebes, membro na'in-14 ne'ebé halo parte comissão instaladora, sira despede de'it e la iha respeito ba ema nia direito. Ne'ebe, ba caso rua ne'e ami hussu atu regista, ami sei avança ho pedido de auditoria ba *free balance* ne'ebé gasta ossan Estado nian barak tebes, to'o ohin lora mós sei sai segredo ida, e ita timoroan seidauk bele domina iha-ne'ebá. E seluk maka inquérito parlamentar ba abuso de poder e sistema de familiarismo no compadrio ne'ebé iha Instituto ou Ministério ne'ebé tutela instituição sira.

Obrigado, Sr. Presidente, desculpa ba tempo ida-ne'e.

Sr. **Presidente**: — Obrigado, Sr. Deputado

Sr. Deputado sira, lei inquérito parlamentar existe, vigora hela, ne'e Deputado ho bancada sira-nia competência tomak atu usa lei ne'e ba qualquer iniciativa.

Ponto de ordem: Sr.<sup>a</sup> Deputada «Bi Soi». Halo favor.

Sr.<sup>a</sup> **Maria Rosa da Câmara** «Bi Soi» (CNRT): — Obrigada ba tempo, Sr. Presidente.

Bom dia, Sr. Presidente, Sr.<sup>a</sup> Secretária de Estado dos Assuntos Parlamentares ho Deputado sira hotu.

Horissehik kedas mak ha'u atu ko'alia, maibé la iha tempo nafatin, e ohin mós dehan la iha. Nune'e, liuhossi biban ida-ne'e hakarak hato'o de'it ponto rua. Primeiro, atu ko'alia kona-ba *Jornal Nacional Diário* ne'ebé sai iha dia 7: loos duni, entrevista ha'u duni, maibé título ida-ne'ebé tau iha leten ne'e ilegal. Ba título ilegal ne'e tau fali katak ha'u ne'e idade ki'ikoan mak kaer kilat iha ai-laran ne'ebá no tiro malu ho idade ki'ik. Lae, la'ós hanessian ne'e ida! Ida-ne'e atu convence veterano hotu-hotu, ka FALINTIL hotu-hotu, katak ha'u mak tiro malu maka'as iha-ne'ebá, ne'e la'ós hanessian ne'e ida! Função mak dupla, ne'e feto ka mane iha-ne'ebá ne'e hassoru política ho militar. Inimigo la buka de'it ida ne'ebé mak kaer kilat, maibé buka mós ema ne'ebé participa iha resistência. Função ne'e mak ho militar e política, la'ós ha'u mak kaer kilat iha-ne'ebá tiro malu loron-kalan. Jornalista sira, hakarak jornal atu folin karik, tau buat ne'ebé loos, labele tau filafali título ilegal para ema hodi sossa.

Segundo, ha'u atu ko'alia kona-ba Comandante-Geral PNTL. Foin lailais iha dia 9, sexta-feira, tuku 4:30, ne'ebé nia sai hussi ninia fatin mai iha dalan público, ne'e precisa polícia taka iha leten, taka iha kraik, para nia sai hussi klaran. Dalan ida leten ne'e ha'u-nia carreta mak halai uluk, mas nia quando taka iha-ne'e carreta hotu-hotu tem que para iha lampu ne'ebé mean, ema sorin ne'e atu tama mai, e iha-ne'e nian sa'e filafali bá, maski lampu to'o verde ona mós seidak bele sai. Tanba saida? Tanba Comandante-Geral Júlio Hornay sai hussi ninia fatin. Ne'e iha kraik mós taka, hussi parte Ministério da Justiça nian la bele halai sa'e bá. Ida-ne'e baseia ba saida? Lei iha-ne'ebé hatete katak comandante-geral ida quando sai hussi ninia fatin ou ministro ida quando sai hussi ninia fatin, dalan hotu-hotu tem que taka?! Ha'u-nia carreta mak halai uluk, polícia ne'e, quando nia para carreta, ha'u hanoin kala hatún bandeira, e ne'e sei tuku 4:30, ne'e la hatún bandeira, maibé Comandante Polícia nian mak halai sai mai. Carreta ambulância ida ne'ebé ita propõe ossan hodi sossa ne'e, nu'ussá la apita de'it, ema atenção tiha ona, e ne'e nia bele halai sai. Ne'e precisa de'it ambulância ida iha kotuk, ida iha oin, mas ida-ne'e precisa tan polícia hodi para tan tiha fali iha dalan público. Sr.<sup>a</sup> Secretária de Estado dos Assuntos Parlamentares, hato'o hela ba Ministro sira atu haree didi'ak buat sira hanessian ne'e. Iha rain ida-ne'e, sé mak atu oho Júlio ne'e? Sé mak atu oho? Sé mak barani atu oho polícia ida iha momento ida concreto hanessian ne'e?! Tem que hanoin halo didi'ak!

**Lian hussi CNRT:** Ex-polícia tan!

Sr.<sup>a</sup> **Maria Rosa da Câmara** «Bi Soi» (CNRT): — Nia ex-polícia Indonésia nian tan ne'e, ne'e ema louva nia maka'as tiha ona, nia cargo ba beibeik ona. Nia ha'u-nia colega di'ak, nia cargo mós ba beibeik ona, e ema ida atu hanoin aat hodi oho nia ne'e la iha. Depois, polícia sai mai ho kilat hamriik



iha estrada hanessian ne'e mak para ha'u-nia carreta ne'ebé halai iha oin. Ne'e ha'u sente ladún di'ak karik. Ha'u de'it mós, ha'u sente katak ema ida la oho ha'u, tanba ha'u ne'e uluk contra duni inimigo. La oho ha'u ida, nu'ussá mak Júlio ema bele oho?!

Obrigada.

**Sr. Presidente:** — Obrigado, Sr.<sup>a</sup> Deputada.

Ponto de ordem barak loos, e usa liu tiha fali tempo.

Sr.<sup>a</sup> Deputada «Bilou-Mali», ba ponto de ordem. Ha'u, ohin, hussu hela ba Ita-Boot sira atu ita bele hotu halo tiha lista sira-ne'e ka hotu ona tuir horas, mas ponto de ordem continua. Halo favor, Sr.<sup>a</sup> Deputada.

**Sr.<sup>a</sup> Domingas Alves da Silva** «Bilou-Mali» (CNRT): — Obrigado ba Sr. Presidente em exercício.

Bom dia ba composição da Mesa, Ex.<sup>a</sup> Secretária de Estado dos Assuntos Parlamentares, colega Deputado sira e maluk sira ne'ebé tuur iha kotuk hodi acompanha mós.

Assunto ida ne'ebé ohin Deputado Manuel Gaspar foti kona-ba bee moos, iha fulan agosto iha dia 4, ha'u foti tiha ona. Ne'e iha recesso nia laran, ha'u ho colega sira, ami mak halo parte iha Comissão Permanente, ha'u foti tiha ona ida-ne'e. Iha ida-ne'e ninia kotuk liubá, iha 2014, ha'u mós foti, tanba kona-ba bee moos ida-ne'ebé ohin Deputado Manuel Gaspar foti ne'e, conforme informação ne'ebé ha'u rona katak maluk sira ne'ebé bee-na'in, ka hela bessik bee-matan ne'e, fa'an bee. Diretor companhia ne'e fó tiha lai 15 000 USD mak sira foin hussik bee para dada ba comunidade sira iha suco Uaitame. Iha Suco Uaitame, depois de construção tanque ne'e hotu, bee mai duni, sira usa tiha ona semana rua ressin, ema ne'ebé kaer projeto ne'e seidauk fó 15 000 USD ne'e mak sira taka filafali. Iha caso ida-ne'e mós inclui professor balu iha laran ne'ebé fila-liman fali ho bee ne'e. Mas, ha'u dehan, baseia ba Constituição RDTL, artigo 139.º, ne'e ko'alia claro iha-ne'ebá katak rico-soin ne'ebé iha rai leten no rai okos ne'e Estado nian, la iha ema ida mak fa'an. Sé mak fa'an ida-ne'e, ne'e crime, nia viola ona lei, Constituição RDTL. Nu'ussá mak autoridade local iha-ne'ebá la participa? E iha tempo ida-ne'ebé ha'u foti, ha'u hussu para Comissão competente bá to'o rassik iha-ne'ebá. Iha tinan 2014, Presidente Comissão E, Sr. Pedro Mártires, ho nia equipa, bá mas sira bá hola de'it informação hussi Sr. Administrador do Posto. Iha tempo ne'e mós sira la'o liu tiha fali ba Watukarabau, la bá to'o iha fatin ida naran Kamuria ne'e, iha suku Babulu. Agora, ha'u hussu para Comissão competente bá to'o iha-ne'ebá. Sr. Administrador Posto Administrativo nian ho Chefe Suku sira tem que resolve caso ne'e. Comunidade ida ne'ebé fa'an fali rico-soin Estado nian ne'e viola lei.

Obrigada barak.

Sr. **Presidente**: — Sr. Deputado sira, ohin ha'u atu termina sessão ida-ne'e, hotu-hotu usa de'it ponto de ordem, mas ha'u hussu katak minuto ida de'it. Ba ponto de ordem ne'e minuto ida de'it, por favor.

Sr. Deputado Natalino, Presidente Bancada CNRT, halo favor.

Sr. **Natalino dos Santos Nascimento** (CNRT): — Obrigado, Sr. Presidente.

Desculpa, ha'u foti ponto de ordem. Ha'u hakarak fó informações tanba iha assunto importante ida, e que veterano Oe-Cusse sira dehan katak sira halo greve loron tolu ona tanba sira la simu ossan. Tanba ida-ne'e mak ha'u foti ne'e. E foin telefone mai ha'u hodi dehan ida-ne'e, ne'ebe hussu ba ha'u atu hato'o. Ha'u dehan: «Loos ka lae?». Sira dehan katak loron tolu. Tan ne'e mak ha'u hussu ba Sr.<sup>a</sup> Secretária de Estado dos Assuntos Parlamentares atu ko'alia to'ok ho Vice-Ministro ne'ebé trata assunto social atu haree to'ok problema veterano sira-nian iha Oe-Cusse. Ne'e dehan katak greve loron tolu ona. Ne'e ha'u foin simu informação, ne'e mak ha'u foti iha-ne'e. Precisa atu haree tanba assuntos veteranos nian importante tebes-tebes.

Obrigado.

Sr. **Presidente**: — Iha tan ponto de ordem hussi Sr.<sup>a</sup> Deputada Albina Marçal. Halo favor.

Sr.<sup>a</sup> **Albina Marçal Freitas** (CNRT): — Sr. Presidente, se ita usa oportunidade iha ponto de ordem hodi intervém, então ha'u usa oportunidade ne'e atu ko'alia hotu, tanba ha'u mós inscrito hela.

Sr. **Presidente**: — Sim, tan ne'e mak ohin ha'u hussu ona katak ha'u hussu atu autoriza atu continua halo hotu ka lae? Maibé, hotu-hotu dehan katak para ona, tan ne'e mak iha ponto de ordem. Ponto de ordem ne'e minuto ida de'it, Sr. Deputado sira. Balu halo ponto de ordem hodi justifica no completa fali intervenção ne'ebé Sr. Deputado sira halo tiha. Se Ita-Boot sira bele ajuda ha'u, e ita bele disciplina ba horas, ha'u contente tebetebes. Mas, intervenção la iha, ohin hotu-hotu dehan la iha ona intervenção, então ita para. Regras mak halo ita sai hanessian ne'e, Sr. Deputado sira. Se ita la usa regras, ita bele to'o 2h00 ou 3h00, ha'u pronto hela, ha'u dieta hela, ne'ebe di'ak.

Ponto de ordem: Sr.<sup>a</sup> Deputada Anastácia Amaral. Halo favor.

Sr.<sup>a</sup> **Anastácia da Costa Amaral** (FRETILIN): — Obrigada, Sr. Presidente.

Atu halo defesa de honra de'it. Hanessian membro Comissão, tuir intervenção Sr.<sup>a</sup> Deputada, ha'u-nia camarada, «Bilou-Mali» ninian, ne'e la loos. Comissão to'o duni iha-ne'ebá, e bainhira Comissão atu ba fiscaliza, tem que halo lai encontro ho autoridade local iha-ne'ebá. Depois hotu tiha ida-ne'e,

iha momento ne'ebá ami la'ó hanessan Comissão de Inquérito Parlamentar, nune'e ami to'ó ba Uatucarbau atu haree projeto ponte Irabere nian. Ho ida-ne'e, ha'u atu hussu katak Parlamento la halo decisão, Parlamento atu haree de'it e recomenda ba Governo atu hola decisão.

Ida-ne'e de'it, Sr. Presidente.

Obrigada.

**Sr. Presidente:** — Obrigado, Sr.<sup>a</sup> Deputada.

Iha tan ponto de ordem hussi Deputado Domingos Carvalho. Halo favor

**Sr. Domingos de Carvalho Araújo (CNRT):** — Obrigado ba Sr. Presidente. Bom dia ba Ita-Boot no colega Deputado sira.

Ha'u foti ponto de ordem, ne'e atu hussu tuir de'it ba Mesa, bele karik fô sai naran sira ne'ebé regista hela ne'e, keta menos hussi lima ka neen, di'ak liu ita conclui tiha, tanba ami mós iha problema importante que hakarak ko'alia mós iha fatin ida-ne'e.

Obrigado.

**Sr. Presidente:** — Iha tan ponto de ordem seluk?

Sr. Deputado sira, semana oin ita iha encontro ho ministério lubuk ida, Ita-Boot sira-nia assunto ne'e bele hato'ó diretamente iha tempo ida-ne'ebá. Tau ka aumenta tan e investiga tan halo kle'an liután informação, depois mak hussu ba ne'e completa kedas para hetan resposta.

Bancada FRETILIN iha iniciativa atu halo inquérito parlamentar ba assunto lubuk ida que ohin Ita-Boot sira foti ona, e ne'e importante tebetebes ba questão ida IPG nian ne'e.

Importante tebetebes mós questão seluk sobre lei rai nian ne'ebé ohin Ita-Boot sira foti. Ne'ebe, ha'u hanoin katak di'ak liu tempo barak ne'ebé Ita-Boot sira iha, bele aproveita atu halo preparação ba trabalho sira hanessan ne'e do que ita repete sassán sira ne'ebé Sr. Deputado sira barak mak foti ona.

Sr. Deputado sira, ha'u fó tempo ba Sr.<sup>a</sup> Secretária de Estado dos Assuntos Parlamentares atu fó informação ruma em relação ho perguntas ne'ebé Ita-Boot sira fó no mós agenda seluk. Halo favor, Sr.<sup>a</sup> Secretária de Estado.

**Sr.<sup>a</sup> Secretária de Estado dos Assuntos Parlamentares (Maria Teresinha Viegas):** — Obrigado, Sr. Presidente em Exercício. Bom dia ba Ita-Boot, Vice-Secretária da Mesa no mós distinto Deputado sira hotu.

Ha'u atu adianta de'it intervenção ka declaração política ne'ebé ohin hato'ó hussi distinto Deputado Osório Florindo no mós relaciona ba questão ida-ne'e, ne'ebé foti iha semana hirak liubá, relaciona ho despedimento ba funcionário sira iha IPG, ne'e ami informa tiha ona, maibé karik oportuno liu ho

declaração política ne'e, ami sei hatutan filafali. No mós, hein, karik Bancada FRETILIN bele adianta ho inquérito parlamentar, a ver se ita bele rona dala ida de'it questão ne'ebé acontece, tanba afeta mós ba ita-nia funcionário na'in-14. Tanba ida-ne'e mak ami sei submete ba agenda Parlamento nian no mós ho Plenária ida ohin, ami sei informa ba Ministério competente, liuliu ba Ministério do Petróleo e Recursos Minerais no mós ba Ministério das Finanças, relaciona ho pedido ne'ebé ohin hato'o em nome da Bancada FRETILIN, hussi Deputado Francisco Branco.

Kona-ba distinto Deputado Manuel Gaspar nian, de facto, problema ba projeto bee nian iha Uaitame, ne'ebé hanessan ne'ebé distinta Deputada «Bilou-Mali» mós foti, infelizmente presença Ministro nian iha dia 28 liubá, ne'e Ita la consegue apresenta tanba oportuno tebes atu rona diretamente hussi Ministro, relaciona ho problemas ne'ebé ita hassoru, por exemplo, ba bee moos, eletricidade no infraestrutura. Questão sira-ne'e, iha altura ne'ebá Ita la foti, maibé ami sei hatutan hikis fali ba Ministério, a ver se bele hola consideração, liuliu relaciona ho orçamento ne'ebé la kleur tan ita atu tama ona ba discussão.

Ba distinta Deputada Izilda ninia preocupação, de facto, informação ne'e ami hato'o, maibé respostas ne'ebé ami hetan, ami encaminha hikis fali ba distinto Deputado sira-nia mesa. E karik iha tempo badak, dia 19 de outubro, ita sei iha tan audiência ba debate ho Ministro, liuliu ho Ministério da Saúde, iha-ne'e karik ita bele rona diretamente hussi Ministra ho Vice, relaciona ho preocupação ne'ebé distinto Deputado sira foti. Nune'e mós ba preocupação ne'ebé distinto Deputado Teme foti liu tiha ona, relaciona ho violação ba *kode* ética profissional nian, liuliu ba doutor ida-ne'ebé viola ninia *kode* ética, relaciona ho consultas ne'ebé nia fó ba nia cliente sira iha Ermera.

Ba distinta Deputada Olinda nian, sim, de facto, carta ne'ebé ohin Ita-Boot hato'o, de facto, tinan kotuk hato'o tiha ona, ami encaminha, maibé karik ne'e tinan ida liu tiha ona tanba serviço Executivo nian, maibé ami sei hatutan hikis fali preocupação ou carta ne'ebé hato'o. Nune'e mós, relaciona ho problemas restos mortais nian, iha próximo dia 22, ita sei iha audiência, ka debate, ho Ministra no Vice-Ministro da Solidariedade Social atu nune'e ita bele hetan explicação clara liu hussi membro do Governo competente. Maibé, ami mós hakarak atu hato'o ba Mesa katak hussi Governo sei hein hela, aguarda nafatin carta ba debate refere, relaciona ho Ministério tolu: Ministério da Saúde, Ministério da Educação no mós Ministério da Solidariedade Social.

Kona-ba distinto Deputado «Mandati» nian, ami regista, ami sei encaminha ba Ministério, maibé hanessan ohin ha'u hateten katak Ministra da Saúde sei marca presença iha-ne'e iha próximo 19, a ver se bele fó explicação ruma relaciona ho atendimento iha hospital, liuliu ba medicamentos no mós prestação de serviço hussi agente saúde nian iha hospital. Ha'u mós concorda e agradece ba hanoin ne'ebé distinto Deputado hato'o kona-ba empresas públicas do Estado atubele haree ba fornecimento

de combustível, água no eletricidade, e ne'e ami sei hato'o ba Conselho de Ministros atubele hola atenção no consideração.

Ba distinta Deputada Fernanda Lay, relaciona ho cemitério avô Xavier nian, ami informa tiha ona ba Ministra, nia processo la'o hela, maibé ne'e oportuno karik, iha dia 22 Ministra sei fó explicação ne'ebé mais detalhe.

Ba distinta Deputada Anastácia nian, hanessan ohin ami hatete tiha ona, ba IPG nian, ami sei encaminha informação sira-ne'e, maibé oportuno liu, karik inquérito parlamentar ne'ebé distinto Deputado sira atu halo, ho ida-ne'e karik bele esclarece liután preocupação ne'ebé distinto Deputado sira foti relaciona ho ita-nia funcionário sira ne'ebé hetan despedimento.

Kona-ba rai-henek, ita iha decreto ne'ebé regula kona-ba rai-henek, e ne'e hussi Ministério do Petróleo e Recursos Minerais, maibé ami sei buka, a ver se bele hassai cópia hussi decreto refere atubele fó hodi distinto Deputado sira bele informa ba áreas rurais. Por exemplo, iha-ne'e iha suco Bahalarauain, atu nune'e autoridade local bele iha conhecimento ba processo sira-ne'e tomak.

Liga ba Timor Telecom, Telkomcel ho Telemor nia atendimento, ami sei informa ba Autoridade Reguladora das Comunicações atubele hola atenção no mós hola consideração, liuliu ba acontecimento sira ne'ebé hanessan ohin distinta Deputada Anastácia foti no mós distinto Manuel Gaspar foti.

Relaciona fali ba informação no preocupação ne'ebé hato'o hussi distinto Deputado «Piloto», ita-nia Ministro iha altura ne'ebá marca presença, maibé karik ladún claro ba Ita ou distinto Deputado la questiona sobre projeto refere, ami sei informa hikas fali ba Ministro atubele hola atenção no consideração.

Ba distinta Deputada Benvinda Rodrigues, distinto Deputado Natalino, relaciona ho gestão ba jardim sira, iha Comité de Revisão do Orçamento liubá, hussi Comité de Revisão iha ona concordância katak gestão saneamento ba jardim sira sei recai ba competência Ministério da Administração Estatal nian, e karik iha-ne'e atu haree liu ba manutenção das obras dos jardins, liuliu refere ba Cristo Rei no mós João Paulo II nian. E ida-ne'e, karik haree ba manutenção, maibé kona-ba saneamento Ministério da Administração Estatal mak sei responsabiliza. E ami mós sei informa atu nune'e sira bele tau matan de perto liután, liuliu segurança iha áreas refere no mós orçamento manutenção nian ba jardim sira-ne'e, e ne'e karik mós kona-ba oinsá atu gera receitas ba entradas iha fatin refere.

Kona-ba polícia UPF nian, karik iha-ne'e ami sei la ko'alia ka adianta buat barak, maibé iha orçamento liubá, kona-ba hahán nian, hussi Comando PNTL propõe atu hassa'e rancho nian ne'e, e ne'e não 6,50 USD, maibé 8 USD por pessoa. De maneira que iha Orçamento 2016 nian, durante audiência ita sei bele haree di'ak liután, relaciona ho rancho ba ita-nia agente polícia nian, nune'e mós ba fornecimento ou aquisição de materiais hanessan ne'ebé distinto Deputado foti.

Ami sei informa ba Comandante-Geral, relaciona ho preocupação ne'ebé ohin distinta Deputada «Bi Soi» foti kona-ba atitude ne'ebé mossu.

Ami mós sei informa ba Vice-Ministro e Ministra Solidariedade Social, relaciona ho salário ka pensão ba veterano sira iha Oe-Cusse nian.

Ba distinta Deputada Jacinta, maibé orsida mak informa diretamente de'it ba nia, relaciona ho cobrança ne'ebé hala'o iha Hospital Nacional Guido Valadares, liuliu ba USG (*Urine Specific Gravity*) ) ho raios X ne'ebé hussi Hospital hala'o cobrança bá.

Obrigado, Sr. Presidente.

**Sr. Presidente:** — Obrigado, Sr.<sup>a</sup> Secretária de Estado.

Sr. Deputado sira, assunto ida ohin Sr. Deputado «Mandati» foti ne'e importante tebetebes. Existe hela empresa pública Estado nian, nia naran TIMOR GAP, E.P. (Timor Gas & Petróleo, Empresa Pública), ne'ebé iha tinan hirak ne'e nia laran, maibé la fó tempo ka biban ba sira atu halo netik gestão ruma, nune'e atu capacita sira-nian an iha contexto, por exemplo, fornece combustível. Ne'e ita iha tendência hodi fó liu ba setor privado nacional ho internacional sira oportunidade ne'ebé iha do que ita fó ba empresa pública Estado nian. Sira kala seidak iha nafatin capacitação, tan ne'e mak tempo ba sira ne'e atu bá tuir nafatin *training* de'it, capacitação de'it tinan ba tinan, maibé nunca fó biban ba sira atu kaer oportunidade iha mercado ne'ebé iha. Ne'ebe, observação ida-ne'e capaz tebetebes, karik Comissão C bele haree ida-ne'e, e bele haree mós ba assunto *free balance* nian ne'ebé ita ko'alia começa iha 2008 sobre investimento ba *free balance* ne'e, ho total orçamento por volta de 28 milhões dólares americanos. Ninia lala'ok halo nu'ussá, ninia aproveitamento ne'e halo nu'ussá, ne'e Comissão C no comissão sira seluk tan bele serviço hamutuk atu haree questão ne'e ho kle'an, liuliu sobre aproveitamento ba programa sira ne'ebé gasta ona ossan Estado nian, la'o loloos ou lae.

Ha'u sente mak ne'e de'it, Sr. Deputado sira, Sr.<sup>a</sup> Secretária de Estado dos Assuntos Parlamentares, ita termina sessão ohin nian, lokraik tempo ba Comissão Especializada Permanente sira, liuliu Comissão C atu halo audiência no buat sira-ne'e hotu.

Relatório ne'ebé hato'o hussi auditoria, ne'e faz parte ba Parlamento nia competência hodi cada tinan atu recomenda instituição Estado ne'ebé tem que halo auditoria bá. Tanba ne'e mak Parlamento nia recomendação ba instituição Estado nian iha lubuk ida, e resultado mak Tribunal de Contas apresenta ona ninia auditoria ne'ebé baseia ba recomendação hussi Parlamento Nacional. Tan ne'e mak Comissão C, orsida, hahú ona ninia apreciação ba relatório ne'ebé Tribunal de Contas halo ba nia ministério tolu ne'ebé nia recomendação mai hussi Parlamento Nacional. E ita sei iha tan oportunidade atu recomenda instituição seluk ba Tribunal de Contas atu halo mós auditoria ba próximo nian.

---

Obrigado barak ba Sr. Deputado sira-nia participação e compreensão ba tempo, Sr. Secretária de Estado dos Assuntos Parlamentares, ita taka Sessão Plenária ne'e. Boa tarde e bom almoço.

*Horas hatudu tuku 11 liu minuto 53 dadeer.*

**DIVISÃO DE REDAÇÃO, AUDIOVISUAL, TRANSCRIÇÃO E DOCUMENTAÇÃO.**